



唐書八



伊 8
1795
222



1735
222

天文志第二十二

唐書三十二

日食武德元年十月壬申朔日有食之在氏五度占曰諸侯專權
 則其應在所宿國諸侯附從則為王者事四年八月丙戌朔日有
 食之在翼四度楚分也六年十二月壬寅朔日有食之在南斗十
 九度吳分也九年十月丙辰朔日有食之在氏七度貞觀元年閏
 三月癸丑朔日有食之在胃九度九月庚戌朔日有食之在亢五
 度胃為天倉亢為疏廟二年三月戊申朔日有食之在婁十一度
 占為大臣憂三年八月己巳朔日有食之在翼五度占曰旱四年
 閏正月丁卯朔日有食之在營室四度七月甲子朔日有食之在
 張十四度占為禮失六年正月乙卯朔日有食之在虛九度虛耗
 祥也八年五月辛未朔日有食之在參七度九年閏四月丙寅朔
 日有食之在畢十三度占為邊兵十一年三月丙戌朔日有食之



新部君山同資一
氏書田用書

天文志

在婁二度占爲大臣憂十二年閏二月庚辰朔日有食之在奎九
度奎武庫也十三年八月辛未朔日有食之在翼十四度翼爲遠
夷十七年六月巳卯朔日有食之在東井十六度京師分也十八
年十月辛丑朔日有食之在房三度房將相位二十年閏三月癸
巳朔日有食之在胃九度占曰主有疾二十二年八月巳酉朔日
有食之在翼五度占曰旱顯慶五年六月庚午朔日有食之在柳
五度龍朔元年五月甲子晦日有食之在東井二十七度皆京師
分也麟德二年閏三月癸酉日有食之在胃九度占曰主有疾乾
封二年八月巳酉朔日有食之在翼六度總章二年六月戊申朔
日有食之在東井二十九度咸亨元年六月壬寅朔日有食之在
東井十八度二年十一月甲午朔日有食之在箕九度三年十一
月戊子朔日有食之在尾十度東井京師分箕爲后妃之府尾爲

後宮五年三月辛亥朔日有食之在婁十三度占爲大臣憂永隆
九年十一月壬申朔日有食之在尾十六度開耀元年十月丙寅
朔日有食之在尾四度永淳元年四月甲子朔日有食之在畢五
度十月庚申朔日有食之在房三度垂拱二年二月辛未朔日有
食之在營室十五度四年六月丁亥朔日有食之在東井二十七
度京師分也天授二年四月壬寅朔日有食之在昴七度如意元
年四月丙申朔日有食之在胃十一度皆正陽之月長壽二年九
月丁亥朔日有食之在角十度角內爲天廷延載元年九月壬午
朔日有食之在軫十八度軫爲車騎證聖元年二月巳酉朔日有
食之在營室五度聖曆三年五月巳酉朔日有食之在畢十五度
長安二年九月乙丑朔日有食之幾旣在角初度二年三月壬戌
朔日有食之在奎十度占曰君不安九月庚寅朔日有食之在亢

七度神龍三年六月丁卯朔日有食之在東井二十八度京師分也景龍元年十二月乙丑朔日有食之在南斗二十一度斗爲丞相位先天元年九月丁卯朔日有食之在角十度開元三年七月庚辰朔日有食之在張四度七年五月己丑朔日有食之在畢十五度九年九月乙巳朔日有食之在軫十八度十二年閏十二月丙辰朔日有食之在虛初度十七年十月戊午朔日有食之不盡如鉤在氏九度二十年二月甲戌朔日有食之在營室十度八月辛未朔日有食之在翼七度二十一年七月乙丑朔日有食之在張十五度二十二年十二月戊子朔日有食之在南斗二十三度二十三年閏十一月壬午朔日有食之在南斗十一度二十六年九月丙申朔日有食之在亢九度二十八年三月丁亥朔日有食之在婁三度天寶元年七月癸卯朔日有食之在張五度五載五

月壬子朔日有食之在畢十六度十三載六月乙丑朔日有食之幾既在東井十九度京師分也至德元載十月辛巳朔日有食之既在氏十度上元二年七月癸未朔日有食之既大星皆見在張四度大曆三年三月乙巳朔日有食之在奎十一度十年十月辛酉朔日有食之在氏十一度宋分也十四年七月戊辰朔日有食之在張四度十二月丙寅晦日有食之在危十二度貞元二年八月辛巳朔日有食之在軫八度五年正月甲辰朔日有食之在營室六度八年十一月壬子朔日有食之在尾六度宋分也十二年八月己未朔日有食之在翼十八度占曰旱十七年五月壬戌朔日有食之在東井十度元和三年七月丁巳朔日有食之在七星三度十年八月己亥朔日有食之在翼十八度十三年六月癸丑朔日有食之在輿鬼一度京師分也長慶二年四月辛酉朔日有

食之在胃十三度三年九月壬子朔日有食之在角十二度太和八年二月壬午朔日有食之在奎一度開成元年正月辛丑朔日有食之在虛三度會昌三年二月庚申朔日有食之在東壁一度并州分也四年二月甲寅朔日有食之在營室七度五年七月丙午朔日有食之在張七度六年十二月戊辰朔日有食之在南斗十四度大中二年五月己未朔日有食之在參九度八年正月丙戌朔日有食之在危二度危爲玄枵亦耗祥也咸通四年七月辛卯朔日有食之在張十七度乾符三年九月乙亥朔日有食之在軫十四度四年四月壬申朔日有食之在畢三度六年四月庚申朔日有食之既在胃八度文德元年三月戊戌朔日有食之在胃一度天祐元年十月辛卯朔日有食之在心二度三年四月癸未朔日有食之在胃十二度凡唐著紀二百八十九年日食九十三

朔九十一晦二日一日變貞觀初突厥有五日立照二十三年三月日赤無光李淳風曰日變色有軍急又曰其君無德其臣亂國濮陽復曰日無光主病咸亨元年二月壬子日赤無光癸丑四方濛濛日有濁氣色赤如赭上元二年三月丁未日赤如赭永淳元年三月日赤如赭文明元年二月辛巳日赤如赭長安四年正月壬子日赤如赭景龍三年二月庚申日色紫赤無光開元十四年十二月己未日赤如赭二十九年三月丙午風霾日無光近晝昏也占爲上刑急人不樂生天寶三載正月庚戌日暈五重占曰是謂棄光天下有兵肅宗上元二年二月乙酉白虹貫日大曆二年七月丙寅日旁有青赤氣長四丈餘壬申日上有赤氣長二丈九月乙亥至于辛丑日旁有青赤氣三年正月丁巳日有黃冠青赤珥辛丑亦如之凡氣長而立者爲直橫者爲格立于日上者爲冠

直爲有自立者格爲戰鬪又曰赤氣在日上君有佞臣黃爲土功
青赤爲憂貞元二年閏五月壬戌日有黑暈六年正月甲子日赤
如血十年三月乙亥黃霧四塞日無光元和二年十月壬午日傍
有黑氣如人形跪手捧盤向日盤中氣如人頭四年閏三月日傍
有物如日五年四月辛未白虹貫日十年正月辛卯日外有物如
鳥十一年正月己卯日紫赤無光長慶元年六月己丑白虹貫日
三年二月庚戌白虹貫日寶曆元年六月甲戌赤虹貫日九月甲
申日赤無光二年三月甲午日中有黑氣如杯辛亥日中有黑子
四月甲寅白虹貫日太和二年二月癸亥日無光白霧晝昏十二
月癸亥有黑祲與日如鬪五年二月辛丑白虹貫日六年三月有
黑祲與日如鬪庚戌日中有黑子四月乙丑黑氣蔽日七年正月
庚戌白虹貫日八年七月甲戌白虹貫日日有交暈十月壬寅白

虹貫日東西際天上有青環九年二月辛卯日月赤如血壬辰亦
如之開成元年正月辛丑朔白虹貫日二月己丑亦如之二年十
一月辛巳日中有黑子大如雞卵日赤如赭晝昏至于癸未五年
正月己丑日暈白虹在東如玉環貫珥二月丙辰日有重暈有赤
氣夾日十二月癸卯朔日旁有黑氣來觸會昌元年十一月庚戌
日中有黑子四年正月戊申日無光二月己巳白虹貫日如玉環
大中十三年四月甲午日暗無光咸通六年正月白虹貫日中有
黑氣如雞卵七年十二月癸酉白氣貫日日有重暈甲戌亦如之
白氣兵象也十四年二月癸卯白虹貫日乾符元年日中有黑子
二年日中有若飛鷲者六年十一月丙辰朔有兩日竝出而鬪三
日乃不見鬪者離而復合也廣明元年日暈如虹黃氣蔽日無光
日不可以二虹百殃之本也中和三年三月丙午日有青黃暈四

月丙辰亦如之丁巳戊午又如之光啓三年十一月巳亥下晡日
上有黑氣四年二月巳丑日赤如血庚寅改元文德是日風日赤
無光景福元年五月日色散如黃金光化三年冬日有虹蜺背瑯
彌旬日有赤氣自東北至于東南天復元年十月日色散如黃金
十一月又如之三年二月丁丑日有赤氣自東北至于東南天祐
元年二月丙寅日中見北斗其占重十一月癸酉日中有黃暈旁
有青赤氣二二年正月甲申日有黃白暈暈上有青赤背乙酉亦
如之暈中生白虹漸東長百餘丈二月巳巳日有黃白暈如半環
有蒼黑雲夾日長各六尺餘既而雲變狀如人如馬乃消舊占背
者叛背之象日暈有虹者爲大戰半暈者相有謀蒼黑禳祥也夾
日者賊臣制君之象變而如人者爲叛臣如馬者爲兵三年正月
辛未日有黃白暈上有青赤背二月癸巳日有黃白暈如半環有

青赤背庚戌日有黃白暈青赤背月變貞觀初突厥有三月竝見
儀鳳二年正月甲子朔月見西方是謂朧朧則侯王其舒武太后
時月過望不虧者二天寶三載正月庚戌月有紅氣如垂帶肅宗
元年建子月癸巳乙夜月掩昴而暈色白有白氣自北貫之昴胡
也白氣兵喪建辰月丙戌月有黃白冠連暈圍東井五諸侯兩河
及輿鬼東井京師分也大曆十年九月戊申月暈熒惑畢昴參東
及五車暈中有黑氣乍合乍散十二月丙子月出東方上有白氣
十餘道如匹練貫五車及畢觜觶參東井輿鬼柳軒轅中夜散去
占曰女主凶白氣爲兵喪五車主庫兵軒轅爲後宮其宿則晉分
及京師也元和十一年巳未旦日巳出有虹貫月于營室開成四
年閏正月甲申朔乙酉月在營室正偃魄質成早也占爲臣下專
恣之象五年正月戊寅朔甲申月昏而中未弦而中早也占同上

景福二年十一月有白氣如環貫月穿北斗連太微天復二年十
二月甲申夜月有三暈裏白中赤黃外綠天祐三年二月丙申月
暈熒惑孛彗武德九年二月壬午有星孛于胃昴間丁亥孛于卷
舌孛與彗皆非常惡氣所生而災甚于彗貞觀八年八月甲子有
星孛于虛危歷玄枵乙亥不見十二年三月乙丑有星孛于畢昴
十五年六月己酉有星孛于太微犯郎位七月甲戌不見龍朔三
年八月癸卯有彗星于左攝提長二尺餘乙巳不見攝提建時節
大臣象乾封二年四月丙辰有彗星于東北在五車畢昴間乙亥
不見上元二年十二月壬午有彗星于角亢南長五尺三年七月
丁亥有彗星于東井口北河長三尺餘東北行光芒益盛長三丈
掃中台指文昌九月乙酉不見東井京師分中台文昌將相位兩
河天闕也開耀元年九月丙申有彗星于天市中長五丈漸小東

行至河鼓癸丑不見市者貨食之所聚以衣食生民者一曰帝將
遷都河鼓將軍象永淳二年三月丙午有彗星于五車北四月辛
未不見光宅元年九月丁丑有星如半月見于西方月衆陰之長
星如月者陰盛之極文明元年七月辛未夕有彗星于西方長丈
餘八月甲辰不見是謂天撓景龍元年十月壬午有彗星于西方
十一月甲寅不見二年二月丁酉有星孛于胃昴間胡分也八月
壬辰有星孛于紫宮延和元年六月有彗星自軒轅入太微至大
角滅開元十八年六月甲子有彗星于五車癸酉有星孛于畢昴
二十六年三月丙子有星孛于紫宮垣歷北斗魁旬餘因陰雲不
見乾元三年四月丁巳有彗星于東方在婁胃間色白長四尺東
方疾行歷昴畢觜鵬參東井輿鬼柳軒轅至右執法西凡五旬餘
不見閏月辛酉朔有彗星于西方長數丈至五月乃滅婁爲魯胃

昴畢爲趙背鵬參爲唐東井輿鬼爲京師分柳其半爲周分二胃
仍見者荐禍也又婁胃間天倉大曆元年十二月巳亥有彗星于
匏瓜長尺餘經二旬不見犯宦者星五年四月巳未彗星于五
車光芒蓬勃長三丈五月巳卯彗星見于北方色白癸未東行近
八穀中星六月癸卯近三公巳未不見占曰色白者太白所生也
七年十二月丙寅有長星于參下其長亘天長星彗屬參唐星也
元和十年三月有長星于太微尾至軒轅十二年正月戊子有彗
星于畢長慶元年正月巳未彗星于翼二月丁卯彗星于太微西
上將六月有彗星于昴長一丈凡十日不見太和二年七月甲辰
有彗星于右攝提南長二尺三年十月客星見于水位八年九月
辛亥有彗星于太微長丈餘西北行越郎位庚申不見開成二年
二月丙午有彗星于危長七尺餘西指南斗戊申在危西南芒耀

愈盛癸丑在虛辛酉長丈餘西行稍南指壬戌在婺女長二丈餘
廣三尺癸亥愈長且濶三月甲子在南斗乙丑長五丈其末兩岐
一指氏一掩房丙寅長六丈無岐北指在亢七度丁卯西北行東
指巳巳長八丈餘在張癸未長三尺在軒轅右不見凡彗星晨出
則西指夕出則東指乃常也未有遍指四方凌犯如此之甚者甲
申客星出于東井下戊子客星別出于端門內近屏星四月丙午
東井下客星沒五月癸酉端門內客星沒壬午客星如孛在南斗
天籥旁八月丁酉有彗星于虛危虛危爲玄枵枵耗名也三年十
月乙巳有彗星于軫魁長二丈餘漸長西指十一月乙卯有彗星
于東方在尾箕東西亘天十二月壬辰不見四年正月癸酉有彗
星于羽林衛分也閏月丙午有彗星于卷舌西北二月巳卯不見
五年二月庚申有彗星于營室東壁間二十日滅十一月戊寅有

彗星于東方燕分也會昌元年七月有彗星于羽林營室東壁間也十一月壬寅有彗星于北落師門在營室入紫宮十二月辛卯不見并州分也大中六年三月有彗星于觜參參唐星也十一年九月乙未彗星于房長三尺咸通五年五月己亥夜漏未盡一刻有彗星出于東北色黃白長三尺在婁徐州分也九年正月有彗星于婁胃十年八月有彗星于大陵東北指占爲外夷兵及水災乾符四年五月有彗星光啓元年有彗星于積水積薪之間二年五月丙戌有星孛于尾箕歷北斗攝提占曰貴臣誅大順二年四月庚辰有彗星于三台東行入太微掃大角天市長十丈餘五月甲戌不見宦者陳匡知星奏曰當有亂臣入宮三台太一三階也太微大角帝廷也天市都市也景福元年五月蚩尤旗見初出有白彗形如髮長三尺許經數日乃從中天下如匹布至地如蛇

六月孫儒攻楊行密于宣州有黑雲如山漸下墜于儒營上狀如破屋占曰營頭星也十一月有星孛于斗牛占曰越有自立者十二月丙子天攙出于西南巳卯化爲雲而沒二年三月天久陰至四月乙酉夜雲稍開有彗星于上台長十餘丈東行入太微掃大角入天市經三旬有七日益長至二十餘丈因雲陰不見乾寧元年正月有星孛于鶉首秦分也又星隕于西南有聲如雷七月妖星見非彗非孛不知其名時人謂之妖星或曰惡星三年十月有客星三一大二小在虛危間乍合乍離相隨東行狀如鬪經三日而二小星沒其大星後沒虛危齊分也光化三年正月客星出于中垣宦者旁大如桃光炎射宦者宦者不見天復元年五月有三赤星各有鋒芒在南方旣而西方北方東方亦如之頃之又各增一星凡十六星少時先從北滅占曰濛星也見則諸侯兵相攻二

年正月客星如桃在紫宮華蓋下漸行至御女丁卯有流星起文昌抵客星客星不動巳巳客星在杠守之至明年猶不去占曰將相出兵五月夕有星當箕下如炬火炎炎上衝人初以爲燒火也高丈餘乃隕占曰機星也下有亂天祐元年四月有星狀如人首赤身黑在北斗下紫微中占曰天衝也天衝抱極泣帝前血濁霧下天下冤後三日而黑風晦暝二年四月庚子夕西北隅有星類太上有光似彗長三四丈色如赭辛丑夕色如縞或曰五車之水星也一曰昭明星也甲辰有彗星于北河貫文昌長三丈餘陵中台下台五月乙丑夜自軒轅左角及天市西垣光芒猛怒其長亘天丙寅雲陰至辛未少霽不見兩河爲天闕在東井間而北河中國所經也文昌天之六司天市都市也星變武德三年十月巳未有星隕于東都中隱隱有聲貞觀二年天狗隕于夏州城中十

四年八月有星隕于高昌城中十六年六月甲辰西方有流星如月西南行三丈乃滅占曰星甚大者爲人主十八年五月流星出東壁有聲如雷占曰聲如雷者怒象十九年四月巳酉有流星向北斗杓而滅永徽三年十月有流星貫北極四年十月睦州女子陳碩真反婺州刺史崔義玄討之有星隕于賊營乾封元年正月癸酉有星出太微東流有聲如雷咸亨元年十一月西方有流星聲如雷調露元年十一月戊寅流星入北斗魁中乙巳流星燭地有光使星也神龍三年三月丙辰有流星聲如頽墻光燭天地景龍二年二月癸未有大星隕于西南聲如雷野雉皆雊景雲元年八月巳未有流星出五車至上台滅九月甲申有流星出中台至相滅太極元年正月辛卯有流星出太微至相滅延和元年六月幽州都督孫佺討奚契丹出師之夕有大星隕于營中開元二年

五月乙卯晦有星西北流或如彗或如斗貫北極小者不可勝數
天星盡搖至曙乃止占曰星民象流者失其所也漢書曰星搖者
民勞十二年十月壬辰流星大如桃色赤黃有光燭地占曰色赤
爲將軍使天寶三載閏二月辛亥有星如月墜于東南墜後有聲
至德二載賊將武令珣圍南陽四月甲辰夜中有大星赤黃色長
數十丈光燭地墜賊營中十一月壬戌有流星大如斗東北流長
數丈蛇行屈曲有碎光迸出占曰是謂枉矢廣德二年六月丁卯
有妖星隕于汾州十二月丙寅自乙夜至曙星流如雨大曆二年
九月乙丑晝有星如一斗器色黃有尾長六丈餘出南方沒于東
北東北于中國則幽州分也三年九月乙亥有星大如斗北流有
光燭地占爲貴使六年九月甲辰有星西流大如一斗器光燭地
有尾迸光如珠長五丈出婺女入天市南垣滅八年六月戊辰有

流星大如一升器有尾長三丈餘入太微十二月壬申有流星大
如一升器有尾長二丈餘出紫微入濁十年三月戊戌有流星出
于西方如二升器有尾長二丈入濁十二年二月辛亥有流星如
桃尾長十丈出匏瓜入太微建中四年八月庚申有星隕于京師
興元元年六月戊午星或什或伍而隕貞元三年閏五月戊寅枉
矢墜于虛危十四年閏五月辛亥有星墜于東北光燭如晝聲如
雷元和二年十二月己巳西北有流星亘天尾散如珠占曰有貴
使四年八月丁丑西北有大星東南流聲如雷鼓六年三月戊戌
日晡天陰寒有流星大如一斛器墜于兗鄆間聲震數百里野雉
皆雊所墜之上有赤氣如立蛇長丈餘至夕乃滅時占者以爲日
在戌魯分也不及十年其野主殺而地分九年正月有大星如半
席自下而升有光燭地群小星隨之四月辛巳有大流星尾迹長

五丈餘光燭地至右攝提西滅十二年九月己亥甲夜有流星起中天首如甕尾如二百斛船長十餘丈聲如群鴨飛明如火炬過月下西流須臾有聲礧礧墜地有大聲如壞屋者三在陳蔡間十四年五月己亥有大流星出北斗魁長二丈餘南抵軒轅而滅占曰有赦赦視星之大小十五年七月癸亥有大星出鉤陳南流至婁滅長慶元年正月丙辰有大星出狼星北色赤有尾迹長三丈餘光燭地東北流至七星南滅四月有大星墜于吳聲如飛羽七月乙巳有大流星出參西北色黃有尾迹長六七丈光燭地至羽林滅八月辛巳東北方有大星自雲中出色白光燭地前銳後大長二丈餘西北流入雲中滅二年四月辛亥有流星出天市光燭地隱隱有聲至郎位滅市者小人所聚郎在天廷中主宿衛六月丁酉有小星墜于房心間戊戌亦如之己亥亦如之閏十月丙申

有流星大如斗抵中台上星三年八月丁酉夜有大流星如數斗器起西北經婁東南流去月甚近迸光散落墜地有聲四年四月紫微中星墜者衆十月乙卯有大流星出天船犯斗魁樞星而滅占曰有舟楫事丙子有大流星出天將軍東北入濁寶曆元年正月乙卯有流星出北斗樞星光燭地入濁占曰有赦二年五月癸巳西北有流星長三丈餘光燭地入天市中滅占爲有誅七月丙戌日初入東南有流星向南滅以晷度推之在箕斗間八月丙申有大流星出王良長四丈餘至北斗杓滅王良奉車御官也大和四年六月辛未自昏至戊夜流星或大或小觀者不能數占曰民失其所王者失道綱紀廢則然又曰星在野象物在朝象官七年六月戊子自昏及曙四方流星大小縱橫百餘八年六月辛巳夜中有流星出河鼓赤色有尾迹光燭地迸如散珠北行近天棓

滅有聲如雷河鼓爲將軍天棓者帝之武備九年六月丁酉自昏
至丁夜流星二十餘縱橫出沒多近天漢開成二年九月丁酉有
星大如斗長五丈自室壁西北流入大角下沒行類枉矢中天有
聲小星數百隨之十一月丁丑有大星隕于興元府署寢室之上
光燭庭宇三年五月乙丑有大星出于柳張尾長五丈餘再出再
沒四年二月己亥丁夜至戊夜四方中天流星小大凡二百餘竝
西流有尾迹長二丈至五丈八月辛未流星出羽林有尾迹長八
丈餘有聲如雷羽林天軍也十二月壬申蚩尤旗見會昌元年六
月戊辰自昏至戊夜小星數十縱橫流散占曰小星民象七月庚
午北方有星光燭地東北流經王良有聲如雷十一月壬寅有大
星東北流光燭地有聲如雷四年八月丙午有大星如炬火光燭
天地自奎婁掃西方七宿而隕六年二月辛丑夜中有流星赤色

如桃光燭地有尾迹貫紫微入濁咸通六年七月乙酉甲夜有大
流星長數丈光燦如電群小星隨之自南徂北其象南方有以衆
叛而之北也九年十一月丁酉有星出如匹練亘空化爲雲而沒
在楚分是謂長庚見則兵起十三年春有二星從天際而上相從
至中天狀如旌旗乃隕九月蚩尤旗見乾符二年冬有二星一赤
一白大如斗相隨東南流燭地如月漸大光芒猛怒三年晝有星
如炬火大如五升器出東北徐行隕于西北四年七月有大流星
如盂自虛危歷天市入羽林滅占爲外兵中和元年有異星出于
輿鬼占者以爲惡星八月己丑夜星隕如雨或如杯椀者交流如
織庚寅夜亦如之至丁酉止三年十一月夜星隕于西北如雨光
啓二年九月有大星隕于揚州府署延和閣前聲如雷光炎燭地
十月壬戌有星出于西方色白長一丈五尺屈曲而隕占曰長庚

也下則流血三年五月秦宗權擁兵于汴州北郊晝有大星隕于其營聲如雷是謂營頭其下破軍殺將乾寧元年夏有星隕于越州後有光長丈餘狀如蛇或曰枉矢也三年六月天暴雨雷電有星大如椀起西南墜于東北色如鶴練聲如群鴨飛占爲姦謀光化元年九月丙子有大星墜于北方三年三月丙午有星如二十斛船色黃前銳後大西南行十一月中天有大星自東緩流如帶屈曲光凝著天食頃乃滅是謂枉矢天復三年二月帝至自鳳翔其明日有大星如月自東濁際西流有聲如雷尾跡橫貫中天三夕乃滅天祐元年五月戊寅乙夜雨晦暝有星長二十丈出東方西南向首黑尾赤中白枉矢也一曰長星二年三月乙丑夜中有大星出中天如五斗器流至西北去地十丈許而止上有星芒炎如火赤而黃長丈五許而蛇行小星皆動而東南其隕如雨少頃

沒後有蒼白氣如竹叢上衝天中色蒼蒼占曰亦枉矢也三年十二月昏東方有星如太白自地徐上行極緩至中天如上弦月乃曲行頃之分爲二占曰有大孽

天文志第二十二終

唐書三十二

唐書三十二

天文志第二十三

唐書三十三

唐書三十三

月五星凌犯及星變隋大業十三年六月鎮星羸而旅于參參唐
 星也李淳風曰鎮星主福未當居而居所宿國吉義寧二年三月
 丙午熒惑入東井占曰大人憂武德元年五月庚午太白晝見占
 曰兵起臣彊六月丙子熒惑犯右執法占曰執法大臣象二年七
 月戊寅月犯牽牛凡月與列宿相犯其宿地憂牽牛吳越分九月
 庚寅大白晝見冬熒惑守五諸侯六年七月癸卯熒惑犯輿鬼西
 南星占曰大臣有誅七年六月熒惑犯右執法七月戊寅歲星犯
 畢占曰邊有兵八年九月癸丑熒惑入太微太微天廷也冬太白
 入南斗斗主爵祿九年五月太白晝見六月丁巳經天巳未又經
 天在秦分丙寅月犯氏氏為天子宿宮巳卯太白晝見七月辛亥
 晝見甲寅晝見八月丁巳晝見太白金經天者陰乘陽也貞觀

三年三月丁丑歲星逆行入氏占曰人君治宮室過度一曰饑五年五月庚申鎮星犯鍵閉占為腹心喉舌臣九年四月丙午熒惑犯軒轅十年四月癸酉復行之占曰熒惑主禮禮失而後罰出焉軒轅為後宮十一年二月癸未熒惑入輿鬼占曰賊在大人側十二年六月辛卯熒惑入東井占曰旱十三年五月乙巳犯右執法六月太白犯東井北轅并京師分也十四年十一月壬午入太微占曰君不安十五年二月熒惑逆行犯太微東上相十六年五月太白犯畢左股畢為邊將六月戊戌晝見九月巳未熒惑犯太微西上將十月丙戌入太微犯左執法十七年二月犯鍵閉三月丁巳守心前星癸酉逆行犯鉤鈴熒惑常以十月入太微受制而出伺其所守犯天子所誅也鍵閉為腹心喉舌臣鉤鈴以開闔天心皆貴臣象十八年十一月乙未月掩鉤鈴十九年七月壬午太

白入太微是夜月掩南斗太白遂犯左執法光芒相及箕斗間漢津高麗地也太白為兵亦罰星也二十年七月丁未歲星守東壁占曰五穀以水傷二十一年四月戊寅月犯熒惑占曰貴臣死十二月丁丑月食昴占曰天子破匈奴二十二年五月丁亥犯右執法七月太白晝見乙巳鎮星守東井占曰旱閏十二月辛巳太白犯建星占曰大臣相譖永徽元年二月巳丑熒惑犯東井占曰旱四月巳巳月犯五諸侯熒惑犯輿鬼占曰諸侯凶五月巳未太白晝見二年六月巳丑太白入太微犯右執法九月甲午犯心前星十二月乙未太白晝見三年正月壬戌犯牽牛牽牛為將軍又吳越分也丁亥歲星掩太微上將二月巳丑熒惑犯五諸侯五月戊子掩右執法四年六月巳丑太白晝見六年七月乙亥歲星守尾占曰人主以嬪為后巳丑熒惑入輿鬼八月丁卯入軒轅顯慶元

年四月丁酉太白犯東井北轅占曰秦有兵五年二月甲午熒惑入南斗六月戊申復犯之南斗天廟去復來者其事大且久也龍朔元年六月辛巳太白晝見經天九月癸卯犯左執法二年七月巳丑熒惑守羽林羽林禁兵也三年正月巳卯犯天街占曰政塞姦出六月乙酉太白入東井占曰君失政大臣有誅麟德二年三月戊午熒惑犯東井四月壬寅入輿鬼犯質星乾封元年八月乙巳熒惑入東井二年五月庚申入軒轅三年正月乙巳月犯軒轅大星咸亨元年四月癸卯月犯東井占曰人主憂七月壬申熒惑入東井占曰旱丙申月犯熒惑占曰貴人死十二月丙子熒惑入太微二年四月戊辰復犯太微垣將相位也五年六月壬寅太白入東井上元二年正月甲寅熒惑犯房占曰君有憂一曰有喪二年正月丁卯太白犯牽牛占曰將軍凶儀鳳二年八月辛亥太白

犯軒轅左角左角貴相也三年十月戊寅熒惑犯鉤鈴四年四月戊午入羽林占曰軍憂調露元年七月辛巳入天囷永隆元年五月癸未犯輿鬼丁酉太白晝見經天是謂陰乘陽君道也永淳元年五月丁巳辰星犯軒轅九月庚戌熒惑入輿鬼犯質星十一月乙未復犯輿鬼去而復來是謂句巳垂拱元年四月癸未辰星犯東井北轅辰星為廷尉東井為法令失道則相犯也十二月戊子月掩軒轅大星二年三月丙辰復犯之萬歲通天元年十一月乙丑歲星犯司怪占曰水旱不時聖曆元年五月庚午太白犯天關天關主邊事二年熒惑入輿鬼三年三月辛亥歲星犯左執法久視元年十二月甲戌晦熒惑犯軒轅自乾封二年後月及熒惑太白辰星凌犯軒轅者六長安二年熒惑犯五諸侯渾儀監尚獻甫奏臣命在金五諸侯太史之位火克金臣將死矣武后曰朕為

卿讓之以獻甫爲水衡都尉水生金又去太史之位卿無憂矣是秋獻甫卒四年熒惑入月鎮星犯天關神龍元年三月癸巳熒惑犯天田占曰旱七月辛巳掩氏西南星占曰賊臣在內二年閏正月丁卯月掩軒轅后星九月壬子熒惑犯左執法巳巳月犯軒轅后星十一月辛亥犯昴占曰胡王死戊午熒惑入氏十二月丁酉犯天江占曰旱三年五月戊戌太白入輿鬼中占曰大臣有誅景龍三年六月癸巳太白晝見在東井京師分也四年二月癸未熒惑犯天街五月甲子月犯五諸侯景雲二年三月壬申太白入羽林八月巳未歲星犯執法三月壬申熒惑入東井先天元年八月甲子太白襲月占曰太白兵象月大臣體二年十一月丙子熒惑犯司怪開元二年七月巳丑太白犯輿鬼東南星七年六月甲戌太白犯東井鉞星占曰斧鉞用八年三月庚午犯東井北轅五月

甲子犯軒轅十一年十一月丁卯歲星犯進賢十四年十月甲寅太白晝見二十五年六月壬戌熒惑犯房二十七年七月辛丑犯南斗占曰貴相凶天寶十三載五月熒惑守心五旬餘占曰王去其宮十四載十二月月食歲星在東井占曰其國亡東井京師分也至德二載七月巳酉太白晝見經天至于十一月戊午不見歷秦周楚鄭宋燕之分十二月歲星犯軒轅大星占曰女主謀君乾元元年五月癸未月掩心前星占曰太子憂六月癸丑入南斗魁中占曰大人憂二年正月癸未歲星蝕月在翼楚分也一曰饑二月丙辰月犯心中星占曰王命惡之上元元年五月癸丑月掩昴占曰胡主死八月巳酉太白犯進賢十二月癸未歲星掩房占曰將相憂三年建子月癸巳月掩昴出昴北八月丁卯又掩昴寶應二年四月巳丑月掩歲星占曰饑永泰元年九月辛卯太白晝見

經天大曆二年七月癸亥熒惑入氏其色赤黃乙丑鎮星犯水位
占曰有水災乙亥歲星犯司怪八月壬午月入氏丙申犯畢九月
戊申歲星守東井占皆爲有兵乙丑熒惑犯南斗在燕分十二月
丁丑犯壘壁占曰兵起三年正月壬子月掩畢八月己未復掩畢
辛酉入東井九月壬申歲星入輿鬼占曰歲星爲貴臣輿鬼主死
喪丁丑熒惑入太微二旬而出己卯太白犯左執法四年二月壬
寅熒惑守房上相丙午有芒角三月壬午逆行入氏中是月鎮星
犯輿鬼七月戊辰熒惑犯次相九月丁卯犯建星占曰大臣相譖
五年二月乙巳歲星入軒轅六月丁酉月犯進賢庚子犯氏庚戌
太白入東井六年七月乙巳月掩畢入畢中壬子月犯太微八月
甲戌熒惑犯鄭星庚辰月入太微九月壬辰熒惑犯哭星庚子犯
泣星是夜月掩畢丁未入太微十月丁卯掩畢己巳熒惑犯壘壁

甲戌月入軒轅占曰憂在後宮十一月壬寅入太微丙午掩氏十
二月己巳入太微七年正月乙未犯軒轅二月戊午掩天關占曰
亂臣更天子法令己巳熒惑犯天街四月丁巳入東井辛未歲星
犯左角占曰天下之道不通壬申月入羽林五月丙戌入太微八
年四月癸丑歲星掩房占曰將相憂又宋分也甲寅熒惑入壘壁
五月庚辰入羽林七月己卯太白入東井留七日非常度也占曰
秦有兵乙未月入畢中癸未入羽林己丑太白入太微占曰兵入
天廷八月晝見十月丁巳月掩畢壬戌入輿鬼掩質星庚午月及
太白入氏中占曰君有哭泣事十一月己卯月入羽林癸未太白
入房占曰白衣會不曰犯而曰入蓋鉤鈴間癸丑月掩天關甲寅
入東井癸酉入羽林九年三月丁未熒惑入東井四月丁丑月入
太微五月己未太白入軒轅占曰憂在後宮六月己卯月掩南斗

庚辰入太微七月甲辰掩房辛亥入羽林壬戌入輿鬼九月辛丑
太白入南斗占曰有反臣又曰有赦甲子熒惑入氏宋分也十月
戊子歲星入南斗占曰大臣有誅十二月戊辰月入羽林十年三
月庚戌熒惑入壘壁四月甲子入羽林八月戊辰月入太微十一
年閏八月丁酉太白晝見經天十二年正月乙丑月掩軒轅癸酉
掩心前星宋分也丙子入南斗魁中二月乙未鎮星入氏中占曰
其分兵喪李正巳地也三月壬戌月入太微四月乙未掩心前星
五月丙辰入太微戊戌入羽林七月庚戌入南斗乙亥熒惑入東
井十月壬辰月掩昴庚子入太微十一月乙卯入羽林十二月壬
午復入羽林自六年至此月入太微者十有二入羽林者八熒惑
三入東井再入羽林三入壘壁月太白歲星皆入南斗魁中十四
年春歲星入東井建中元年十一月月食歲星在秦分占曰其國

亡是月歲星食天尸天尸輿鬼中星占曰有妖言小人在位君王
失樞死者太半三年七月月掩心中星貞元四年五月丁卯月犯
歲星在營室六月癸卯熒惑逆行入羽林占曰軍有憂六年五月
戊辰月犯太白間容一指占曰大將死十年四月太白晝見十一
年七月熒惑太白相繼犯太微上將十三年二月戊辰太白入昴
三月庚寅月犯太白十九年三月熒惑入南斗色如血斗吳越分
色如血者旱祥也二十一年正月巳酉太白犯昴趙分也永貞元
年十二月丙午月犯畢巳酉歲星犯太微西垣將相位也元和元
年十月太白入南斗十二月復犯之斗吳分也二年正月癸丑月
犯太白于女虛二月壬申月掩歲星占曰大臣死四月丙子太白
犯東井北轅巳卯月犯房上相三年三月乙未鎮星蝕月在氏占
曰其地主死四年九月癸亥太白犯南斗七年正月辛未月掩熒

惑五月癸亥熒惑犯右執法六月巳亥月犯南斗魁八年七月癸酉月犯五諸侯十月巳丑熒惑犯太微西上將十二月掩左執法九年二月丁酉月犯心中星七月辛亥掩心中星占曰其宿地凶心豫州分壬辰月掩軒轅是月太白入南斗至十月出乃晝見熒惑入南斗中因留犯之南斗天廟又丞相位也十年八月丙午月入南斗魁中十一年二月丙辰月掩心是月熒惑入氐因逆行三月巳丑月犯鎮星在女齊分也四月丙辰太白犯輿鬼占曰有僂臣六月甲辰月掩心後星是月熒惑復入氐是謂句巳十一月戊寅月犯歲星十二月甲午犯鎮星在危亦齊分也十二年三月丁丑月犯心十三年正月乙未歲星逆行犯太微西上將三月熒惑入南斗因逆留至于七月在南斗中大如五升器色赤而怒乃東行非常也八月甲戌太白犯左執法乙巳熒惑犯哭星十月甲子

月犯昴趙分也十四年正月癸卯月犯南斗魁占曰相凶五月丙戌月犯心中星七月乙酉掩心中星十五年正月丙申復犯中星四月太白犯昴七月庚申熒惑逆行入羽林八月巳卯月掩牽牛吳越分也十一月壬子月犯東井北轅長慶元年正月丙午月掩東井鉞遂犯南轅第一星二月乙亥太白犯昴趙分也丁亥月犯歲星在尾占曰大臣死燕分也三月庚戌太白犯五車因晝見至于七月以歷度推之在唐及趙魏之分占曰兵起七月壬寅月掩房次相九月乙巳太白犯左執法二年九月太白晝見熒惑守天囷六旬餘乃去占曰天囷上帝之藏耗祥也十月熒惑犯鎮星于昴甲子月掩牽牛中星占曰吳越凶十一月丁丑掩左角十二月復掩之占曰將死甲寅月犯太白于南斗四年三月庚午太白犯東井北轅遂入井中晝見經天七日而出因犯輿鬼京師分也五

月乙亥月掩畢大星六月丙戌鎮星依曆在背觜羸行至參六度
當居不居失行而前遂犯井鉞占曰所居宿久國福厚易福薄又
曰羸為王不寧鉞主斬刈而又犯之其占重癸未熒惑犯東井丁
亥入井中巳丑太白犯軒轅右角因晝見至于九月占曰相凶十
月辛巳月入畢口十一月熒惑逆行向參鎮星守天關十二月戊
子月掩東井寶曆元年四月壬寅熒惑入輿鬼掩積尸七月癸卯
犯執法甲辰鎮星犯東井甲子月掩畢大星癸未太白犯南斗丙
戌月犯畢十月辛亥犯天困十一月庚辰鎮星復犯東井癸未月
犯東井二年正月甲申犯左執法戊子入于氏二月丙午犯畢五
月甲午熒惑犯昴六月太白犯昴七月壬申月犯畢八月庚戌熒
惑犯輿鬼大和元年正月庚午月掩畢三月癸丑人畢口掩大星
月變于畢者自寶曆元年九月及茲而五五月月掩熒惑在太微

西垣丙戌熒惑犯右執法大和二年正月庚午月掩鎮星七月甲
辰熒惑掩輿鬼質星十月丁卯月掩東井北轅三年二月乙卯太
白犯昴壬申熒惑掩右執法七月入于氏十月入于南斗四年四
月庚申月掩南斗杓次星十一月辛未熒惑犯右執法五年二月
甲申月掩熒惑三月熒惑犯南斗杓次星六年四月辛未月掩鎮
星于端門巳丑太白晝見七月戊戌月掩心中大星辛丑掩南斗杓
次星七年五月甲辰熒惑守心中星六月丙子月掩心中星遂犯
熒惑七月甲午月掩心中星丙申掩南斗口第二星九月丁巳入
于箕戊辰入于南斗癸酉太白入南斗冬鎮星守角八年二月始
去七月戊子月犯昴十月庚子熒惑鎮星合于亢十二月丙戌月
掩昴是歲月入南斗者五占曰大人憂九年夏太白晝見自軒轅
至于翼軫六月庚寅月掩歲星在危而暈十月庚辰月復掩歲星

在危開成元年正月甲辰太白掩建星占曰大臣相譖六月丁未
月掩心前星八月乙巳入南斗二年正月壬申月掩昴二月巳亥
月掩太白于昴中六月甲寅月掩昴而暈太白亦有暈六月巳酉
大星晝見庚申太白入于東井七月壬申月入南斗丁亥掩太白
于柳八月壬子太白入太微遂犯左右執法九月丙子月掩昴三
年二月巳酉掩心前星二月戊午熒惑入東井三月乙酉入輿鬼
五月辛酉太白犯輿鬼庚午月犯心中星甲寅太白犯右執法七
月乙丑月掩心前星十月辛卯太白犯南斗四年二月丁卯月掩
歲星于畢三月乙酉掩東井七月乙未月犯熒惑占曰貴臣死八
月壬申熒惑犯鉞遂入東井十月戊午辰星入南斗魁中占曰大
赦五年春木當王而歲星小闇無光占曰有大喪二月壬申熒惑
入輿鬼四月太白歲星入輿鬼五月辰星見于七星色赤如火七

月乙酉月掩鎮星會昌元年閏八月丁酉熒惑入輿鬼中占曰有
兵喪十二月庚午月犯太白于羽林二年正月壬戌掩太白于羽
林六月丙寅太白犯東井十月丙戌月掩歲星于角三年三月丙
申又掩歲星于角七月癸巳熒惑入東井色蒼赤動搖井中八月
丁丑犯輿鬼十月壬午晝月食太白于亢四年二月歲星守房掩
上相熒惑逆行守軒轅四旬乃去庚申月掩畢大星十月癸未太
白與熒惑合遂入南斗五年二月壬午太白掩昴五月辛酉入畢
口八月壬午犯軒轅大星九月癸巳熒惑犯太微上將六年二月
丁丑犯畢大星丁亥月出無光犯熒惑于太微頃之乃稍有光遂
犯左執法丙申掩牽牛南星遂犯歲星牽牛楊州分大中十一年
八月熒惑犯東井咸通十年春熒惑逆行守心乾符二年四月庚
辰太白晝見在昴三年七月常星晝見四年七月月犯房六年冬

歲星入南斗魁中占曰有反臣光啓二年四月熒惑犯月角文德元年七月丙午月入南斗八月熒惑守輿鬼占曰多戰死龍紀元年七月甲辰月犯心乾寧二年七月癸亥熒惑犯心光化二年鎮星入南斗三年八月壬申太白應見在氏不見至九月丁亥乃見是謂當出不出十一月丁未太白犯月因晝見天復元年五月自丁酉至于巳亥太白晝見經天在井度十月大角五色散搖煌煌如火占曰王者惡之二年五月甲子太白襲熒惑在軒轅后星上太白遂犯端門又犯長垣中星占曰賊臣謀亂京畿大戰十月甲戌太白夕見在斗去地一丈而墜占曰兵聚其下又曰山摧石裂大水竭庚子辰星見氏中小而不明占曰負海之國大水是歲鎮星守虛三年二月始去虛十一月丙戌太白在南斗去地五尺許色小而黃至明年正月乃高十丈光芒甚大是冬熒惑徘徊于東

井間久而不去京師分也天祐元年二月辛卯太白夕見昴西色赤炎燄如火壬辰有三角如花而動搖占曰有反城有火災胡兵起六月甲午太白在張芒角甚大癸丑句巳犯水位自夏及秋大角五色散搖煌煌然占同天復初三年八月丙午歲星在哭星上生黃白氣如孛狀五星聚合武德元年七月丙午鎮星太白辰星聚于東井關中分也二年三月丙申鎮星太白辰星復聚于東井九年六月巳卯歲星辰星合于東井占曰爲變謀貞觀十八年五月太白辰星合于東井占曰爲兵謀十九年六月丙辰太宗征高麗次安市城太白辰星合于東井史記曰太白爲主辰星爲客爲蠻夷出相從而兵在野爲戰永徽元年七月辛酉歲星太白合于柳在秦分占曰兵起景龍元年十月丙寅太白熒惑合于虛危占曰有喪景雲二年七月鎮星太白合于張占曰內兵太極元年四

月熒惑太白合于東井天寶九載八月五星聚于尾箕熒惑先至而先先去尾箕燕分也占曰有德則慶無德則殃十四載二月熒惑太白鬪于畢昴井鬼間至四月乃伏十五載五月熒惑鎮星同在虛危中天芒角大動搖占者以爲北方之宿子午相衝災在南方至德二載四月壬寅歲星熒惑太白辰星聚于鶉首從歲星也罰星先去而歲星留占曰歲星熒惑爲陽太白辰星爲陰陰主外邦陽主中邦陽與陰合中外相連以兵八月太白芒怒掩歲星于鶉火又晝見經天鶉火周分也乾元元年四月熒惑鎮星太白聚于營室太史南宮沛奏其地戰不勝衛分也大曆三年七月壬申五星竝出東方占曰中國利八年閏十一月壬寅太白辰星合于危齊分也十年正月甲寅歲星熒惑合于南斗占曰饑旱吳越分也一曰不可用兵七月庚辰太白辰星合于柳京師分也建中二

年六月熒惑太白鬪于東井四年六月熒惑太白復鬪于東井京師分也金火罰星鬪者戰象也興元元年春熒惑守歲星在角亢占曰有反臣角亢鄭也貞元四年五月乙亥歲星熒惑鎮星聚于營室占曰其國亡地在衛分六年閏三月庚申太白辰星合于東井占爲兵憂戊寅熒惑犯鎮星在奎魯分也元和九年十月辛未熒惑犯鎮星又與太白合于女在齊分十年六月辛未歲星熒惑太白辰星合于東井占曰中外相連以兵十一年五月丁卯歲星辰星合于東井六月己未復合于東井占曰爲變謀而更事十一月戊子鎮星熒惑合于虛危十二月鎮星太白辰星聚于危皆齊分也十四年八月丁丑歲星太白辰星聚于軫占曰兵喪在楚分與南方夷貊之國十五年三月鎮星太白合于奎占曰內兵徐州分也十二月熒惑鎮星合于奎占曰王憂長慶二年二月甲戌歲

星熒惑合于南斗占曰饑旱八月丙寅熒惑犯鎮星在昴畢因留
相守占曰主憂四年八月庚辰熒惑犯鎮星于東井鎮星既失行
犯鉞而熒惑復往犯之占曰內亂寶曆二年八月丁未熒惑鎮星
復合于東井輿鬼間大和二年九月歲星熒惑鎮星聚于七星三
年四月壬申歲星犯鎮星占曰饑四年五月丙午歲星太白合于
東井六年正月太白熒惑合于羽林十月太白熒惑鎮星聚于軫
八年七月庚寅太白熒惑合相犯推曆度在翼近太微占曰兵起
開成三年六月丁亥太白犯熒惑于張占曰有喪四年正月丁巳
熒惑太白辰星聚于南斗推曆度在燕分占曰內外兵喪改立王
公冬歲星熒惑俱逆行失色合于東井京師分也會昌二年六月
乙丑熒惑犯歲星于翼占曰旱四年十月癸未太白熒惑合于南
斗咸通中熒惑鎮星太白辰星聚于畢昴在趙魏之分詔鎮州王

景崇被袞冕軍府稱臣以厭之文德元年八月歲星鎮星太白聚
于張周分也占曰內外有兵爲河內河東地光化三年十月太白
鎮星合于南斗占曰吳越有兵

五行志第二十四

西川史鳳閣氏甫甫甫

唐書三十四

萬物盈於天地之間而其為物最大且多者有五一曰水二曰火三曰木四曰金五曰土其用於人也非此五物不能以為生而闕其一不可是以聖王重焉夫所謂五物者其見象於天也為五星分位於地也為五方行於四時也為五德稟於人也為五常播於音律為五聲發於文章為五色而總其精氣之用謂之五行自三代之後數術之士興而為災異之學者務極其說至舉天地萬物動植無大小皆推其類而附之於五物曰五行之屬以謂人稟五行之全氣以生故於物為最靈其餘動植之類各得其氣之偏者其發為英華美實氣臭滋味羽毛鱗介文采剛柔亦皆得其一氣之盛至其為變怪非常失其本性則推以事類吉凶影響其說尤為委曲繁密蓋王者之有天下也順天地以治人而取材於萬物

以足用若政得其道而取不過度則天地順成萬物茂盛而民以安樂謂之至治若政失其道用物傷天民被其害而愁苦則天地之氣沴三光錯行陰陽寒暑失節以爲水旱蝗螟風雹雷火山崩水溢泉竭雪霜不時雨非其物或發爲氛霧虹蜺光怪之類此天地災異之大者皆生於亂政而考其所發驗以人事往往近其所失而以類至然時有推之不能合者豈非天地之大固有不可知者邪若其諸物種類不可勝數下至細微家人里巷之占有考於人事而合者有漠然而無所應者皆不足道語曰迅雷風烈必變蓋君子之畏天也見物有反常而爲變者失其本性則思其有以致而爲之戒懼雖微不敢忽而已至爲災異之學者不然莫不指事以爲應及其難合則旁引曲取而遷就其說蓋自漢儒董仲舒劉向與其子歆之徒皆以春秋洪範爲學而失聖人之本意至其

不通也父子之言自相戾可勝歎哉昔者箕子爲周武王陳禹所有洪範之書條其事爲九類別其說爲九疇謂之九疇考其說初不相附屬而向爲五行傳乃取其五事皇極庶證附於五行以爲人事皆屬五行歟則至於八政五紀三德稽疑福極之類又不能附至俾洪範之書失其倫理有以見所謂旁引曲取而遷就其說也然自漢以來未有非之者又其祥青禍疢之說自其數術之學故略存之庶幾深識博聞之士有以考而擇焉夫所謂災者被於物而可知者也水旱蝗螟之類是已異者不可知其所以然者也日食星孛五石六鷁之類是已孔子於春秋記災異而不著其事應蓋慎之也以謂天道遠非諄諄以諭人而君子見其變則知天之所以譴告恐懼修省而已若推其事應則有合有不合有同有不同至於不合不同則將使君子怠焉以爲偶然而不懼此其深

意也蓋聖人慎而不言如此而後世猶爲曲說以妄意天此其不可以傳也故考次武德以來略依洪範五行傳著其災異而削其事應云五行傳曰田獵不宿飲食不享出入不節奪民農時及有姦謀則木不曲直謂生不暢茂多折槁及爲變怪而失其性也又曰貌之不恭是謂不肅厥咎狂厥罰常雨厥極凶時則有服妖時則有龜孽時則有雞禍時則有下體生上之病時則有青眚青祥鼠妖惟金沴木木不曲直武德四年亳州老子祠枯樹復生枝葉老子唐祖也占曰枯木復生權臣執政眚孟以爲有受命者九年三月順天門樓東柱已傾毀而自起占曰木仆而自起國之災永徽二年十一月甲申陰霧凝凍封樹木數日不解劉向以爲木少陽貴臣象此人將有害則陰氣脅木先寒故得雨而冰也亦謂之樹介介兵象也顯慶四年八月有毛桃樹生李李國姓也占曰木

生異實國王殃麟德元年十二月癸酉氛霧終日不解甲戌雨水冰儀鳳三年十一月乙未昏霧四塞連夜不解丙申雨水冰垂拱四年三月雨桂子于台州旬餘乃止占曰天雨草木人多死長壽二年十月萬象神宮側檉杉皆變爲栢栢貫四時不改柯易葉有士君子之操檉杉柔脆小人性也象小人居君子之位延載元年十月癸酉白霧水冰景龍四年三月庚申雨水冰景雲二年高祖故第有柿樹自天授中枯死至是復生開元二十一年蓬州枯楊生李枝有實與顯慶中毛桃生李同二十九年亳州老子祠枯樹復榮是十一月巳巳寒甚雨水冰數日不解永泰元年三月庚子夜霜木有冰大曆二年十一月紛霧如雪草木冰九年晉州神山縣慶唐觀枯檜復生興元元年春亳州真源縣有李樹植巳十四年其長尺有八寸至是枝忽上聳有六尺周迴如蓋九尺餘李國

唐書三十四
姓也。占曰：木生枝，聳國有寇盜。是歲中書省枯柳復榮。貞元元年十二月，雨木冰。四年正月，雨木于陳留十里許，大如指，長寸餘。中空，所下者立如植木，生于下而自上墮者。上下易位之象。碎而中空者，小人象。如植者，自立之象。二十年冬，雨木冰。元和十五年九月，巳酉大雨，樹無風而摧者十五六。近木自拔也。占曰：木自拔，國將亂。長慶三年十一月，丁丑雨木冰。成都栗樹結實，食之如李。寶曆元年十一月，丙申雨木冰。大和三年，成都李樹生木瓜，空中不實。七年十二月，丙戌夜霧，木冰。開成四年九月，辛丑雨雪，木冰。十月，巳巳亦如之。會昌元年十二月，丁丑雨木冰。四年正月，巳酉雨木冰。庚戌亦如之。咸通十四年四月，成都李實變為木瓜。時人以爲李國姓也。變者國奪於人之象。廣明二年春，眉州有檀樹，巳枯。倒一夕復生。常雨。武德六年秋，關中久雨，少陽曰暘，少陰曰雨。陽

德衰則陰氣勝，故常雨。貞觀十五年春，霖雨。永徽六年八月，京城大雨。顯慶元年八月，霖雨。更九旬乃止。開元二年五月，壬子久雨。崇京城門十六年九月，關中久雨，害稼。天寶五載秋，大雨。十二載八月，久雨。十三載秋，大霖雨，害稼。六旬不止。九月，閉坊市北門，蓋井，禁婦人入街市。祭玄冥太社，崇明德門，壞京城垣屋，殆盡。人亦乏食。至德二載三月，癸亥大雨，至甲戌乃止。上元元年四月，雨訖。閏月乃止。二年秋，霖雨連月，渠竇生魚。永泰元年九月，丙午大雨。至于丙寅。大曆四年四月，雨。至于九月，閉坊市北門，置土臺。臺上置壇，立黃幡，以祈晴。六年八月，連雨，害秋稼。貞元二年正月，乙未大雨，雪。至于庚子，平地數尺。雪上黃黑如塵。五月，乙巳雨。至于丙申，時大飢。至是麥將登，復大雨，霖衆心恐懼。十年春，雨至閏四月，間止。不過一二日。十一年秋，大雨。十九年八月，巳未大雨，霖雨。元和

唐書三十四
四年四月冊皇太子寧以雨露服罷十月再擇日冊又以雨露服罷近常雨也六年七月霖雨害稼十二年五月連雨八月壬申雨至于九月戊子十五年二月癸未大雨八月久雨閉坊市北門宋滄景等州大雨自六月癸酉至于丁亥廬舍漂沒殆盡寶曆元年六月雨至于八月大和四年夏鄆曹濮等州雨壞城郭廬舍殆盡五年正月庚子朔京城陰雪彌旬開成五年七月霖雨葬文宗龍輜陷不能進大中十年四月雨至于九月咸通九年六月久雨崇明德門乾符五年秋大霖雨汾澮及河溢流害稼廣明元年秋八月大霖雨天復元年八月久雨服妖唐初宮人乘馬者依周舊儀著羃離全身障蔽永徽後乃用帷帽施裙及頂頗爲淺露至神龍末羃離始絕皆婦人預事之象太尉長孫無忌以烏羊毛爲渾脫氍帽人多效之謂之趙公渾脫近服妖也高宗嘗內宴太平公主

紫衫玉帶皂羅折上巾具紛礪七事歌舞于帝前帝與武后笑曰女子不可爲武官何爲此裝束近服妖也武后時嬖臣張易之爲母臧作七寶帳有魚龍鸞鳳之形仍爲象牀犀簾安樂公主使尚方合百鳥毛織二裙正視爲一色傍視爲一色日中爲一色影中爲一色而百鳥之狀皆見以其一獻韋后公主又以百獸毛爲韉面韋后則集鳥毛爲之皆具其鳥獸狀工費巨萬公主初出降益州獻單絲碧羅籠裙縷金爲花鳥細如絲髮大如黍米眼鼻胛甲皆備瞭視者方見之皆服妖也自作毛裙貴臣富家多效之江嶺奇禽異獸毛羽採之殆盡韋后妹嘗爲豹頭枕以辟邪白澤枕以辟魅伏熊枕以宜男亦服妖也景龍三年十一月郊祀韋后爲亞獻以婦人爲齋娘以祭祀之服執事近服妖也中宗賜宰臣宗楚客等巾子樣其制高而踣卽帝在藩邸時冠也故時人號英王踣

唐書三十四
五
踣顛仆也開元二十五年正月道士尹愔爲諫議大夫衣道士服
視事亦服妖也天寶初貴族及士民好爲胡服胡帽婦人則簪步
搖釵衿袖窄小楊貴妃常以假鬢爲首飾而好服黃裙近服妖也
時人爲之語曰義髻拋河裏黃裙逐水流元和末婦人爲圓鬟椎
髻不設鬢飾不施朱粉惟以烏膏注脣狀似悲啼者圓鬟者上不
自樹也悲啼者憂恤象也文宗時吳越間織高頭草履織如綾縠
前代所無履下物也織草爲之又非正服而被以文飾蓋陰斜闌
茸泰侈之象乾符五年雒陽人爲帽皆冠軍士所冠者又內臣有
刻木象頭以裹幞頭百官效之工門如市度木斫之曰此斫尚書
頭此斫將軍頭此斫軍容頭近服妖也僖宗時內人束髮極急及
在成都蜀婦人效之時謂爲囚髻唐末京都婦人梳髮以兩鬢抱
面狀如椎髻時謂之拋家髻又世俗尚以琉璃爲釵釧近服妖也

拋家流離皆播遷之兆云昭宗時十六宅諸王以華侈相尚巾幘
各自爲制度都人倣之則曰爲我作某王頭識者以爲不祥龜孽
大足初虔州獲龜六眼一夕而失肅宗上元二年有鼉聚于揚州
城門上節度使鄧景山以問族弟珽對曰鼉介物兵象也貞元三
年潤州魚鼈蔽江而下皆無首大和三年魏博管內有蟲狀如龜
其鳴晝夜不絕近龜孽也秦宗權在蔡州州中地忽裂有石出高
五六尺廣袤丈餘正如大龜雞禍垂拱三年七月冀州雌雞化爲
雄永昌元年正月明州雌雞化爲雄八月松州雌雞化爲雄景龍
二年春滑州匡城縣民家雞有三足京房易妖占曰君用婦言則
雞生妖玄宗好鬪雞貴臣外戚皆尚之貧者或弄木雞識者以爲
雞酉屬帝生之歲也鬪者兵象近雞禍也大中八年九月考城縣
民家雄雞化爲雌伏于而雄鳴化爲雌王室將卑之象反雌伏也

漢宣帝時雌雞化爲雄至元帝而王氏始萌蓋馴致其禍也咸通六年七月徐州彭城民家雞生角角兵象雞小畜猶賤類也下體生上之病咸通十四年七月宋州襄邑有獵者得雉五足三足出背上足出于背者下于上之象五足者衆也青眚青祥貞觀十七年四月立晉王爲太子有青氣繞東宮殿始冊命而有祲不祥十八年六月壬戌有青黑氣廣六尺貫于辰戌其長亘天大和九年鄭注篋中藥化爲蠅數萬飛去注始以藥術進化爲蠅者敗死之象近青眚也乾元三年六月昏西北有青氣三鼠妖武德元年秋李密王世充隔洛水相拒密營中鼠一夕渡水盡去占曰鼠無故皆夜去邑有兵貞觀十三年建州鼠害稼二十一年渝州鼠害稼顯慶二年長孫無忌第有大鼠見於庭月餘出入無常後忽然死龍朔元年十一月洛州貓鼠同處鼠隱伏象盜竊貓職捕嚙而反與鼠同象司盜者廢職容姦弘道初梁州倉有大鼠長二尺餘爲貓所嚙數百鼠反嚙貓少選聚萬餘鼠州遣人捕擊殺之餘皆去景雲中有蛇鼠鬪于右威衛營東街槐樹蛇爲鼠所傷鬪者兵象景龍元年基州鼠害稼開元二年韶州鼠害稼千萬爲羣天寶元年十月魏郡貓鼠同乳同乳者甚于同處大曆十三年六月隴右節度使朱泚於兵家得貓鼠同乳以獻太和三年成都貓鼠相乳開成四年江西鼠害稼咸通十二年正月汾州孝義縣民家鼠多銜蒿芻巢樹上鼠穴居去穴登木賤人將貴之象乾符三年秋河東諸州多鼠穴屋壞衣三月止鼠盜也天戒若曰將有盜矣乾寧未陝州有蛇鼠鬪于南門之內蛇死而鼠亡去金沱水武德元年八月戊戌突厥始畢可汗衙帳無故自壞中宗卽位金雞竿折樹雞竿所以肆赦始發大號而雞竿折不祥神龍中有羣狐入御史

大夫李承嘉第其堂無故壞又乘筆而管直裂易之又裂開元五年正月癸卯太廟四室壞天寶十四載十二月哥舒翰帥師守潼關前軍啓行牙門旗至坊門觸落槍刃衆以為不祥永泰二年三月辛酉中書敕庫壞貞元四年正月庚戌朔德宗御含元殿受朝賀質明殿階及欄檻三十餘間自壞衛士死者十餘人含元路寢大朝會之所御也正月朔一歲之元王者之事天所以儆者重矣太和九年鄭注為鳳翔節度使將之鎮出開遠門旗竿折光啓初揚州府署門屋自壞故隋之行臺門也制度甚宏麗云五行傳曰棄法律逐功臣殺太子以妾為妻則火不炎上謂火失其性而為災也京房易傳曰上不儉下不節盛火數起燔宮室蓋火主禮云又曰視之不明是謂不哲厥咎舒厥罰常燠厥極疾時則有草妖時則有羽蟲之孽時則有羊禍時則有目痲時則有赤眚赤祥惟

水沴火火不炎上貞觀四年正月癸巳武德殿北院火十三年三月壬寅雲陽石燃方丈晝則如灰夜則有光投草木則焚歷年乃止火失其性而沴金也二十三年三月甲午庸火永徽五年十二年乙巳尚書司勳庫火顯慶元年九月戊辰恩州吉州火焚倉廩甲伏民居二百餘家十一月己巳饒州火證聖元年正月丙申夜明堂火武太后欲避正殿徹樂宰相姚璩以為火因人非天災也不宜貶損后乃御端門觀酺引建章故事復作明堂以厭之是歲內庫災燔二百餘區萬歲登封元年三月壬寅撫州火久視元年八月壬子平州火燔千餘家景龍四年二月東都凌空觀災開元五年十一月乙卯定陵寢殿火是歲洪州潭州災延燒州署州人見有物赤而噉噉飛來旋即火發十五年七月甲戌興教門樓柱災是年衡州災延燒三百餘家州人見有物大如甕赤如燭籠所

至火即發十八年二月丙寅大雨雪俄而雷震左飛龍廢災占曰
天火燒殿兵大起十月乙丑東都宮佛光寺火天寶二年六月東
都應天門觀災延燒左右延福國經日不滅京房易傳曰君不思
道天火燔其宮室九載三月華岳廟災時帝將封西嶽以廟災乃
止十載八月丙辰武庫災燔兵器四十餘萬武庫甲兵之本也寶
應元年十二月巳酉大府左藏庫火廣德元年十二月辛卯夜鄂
州大風火發江中焚舟三千艘延及岸上民居二千餘家死者數
千人大曆十年二月莊嚴寺浮圖災初有疾風震電俄而火從浮
圖中出貞元元年江陵度支院火焚江東租賦百餘萬十三年正
月東都尚書省火十九年四月家令寺火二年七月洪州火燔民
舍萬七千家元和七年六月鎮州甲仗庫災王吏坐死者百餘人
八年江陵大火十一年十一月甲戌元陵火李師道起宮室於鄆

州將謀亂既成而火大和二年十一月甲辰禁中昭德寺火延至
宣政東垣及門下省宮人死者數百人三年十月癸丑仗內火四
年三月陳州許州火燒萬餘家十月浙西火十一月揚州海陵火
八年三月揚州火皆燔民舍千區五月巳巳飛龍神駒中殿火十
月揚州市火燔民舍數千區十二月禁中昭成寺火開成二年六
月徐州市火延燒民居三百餘家四年十二月乙卯乾陵火丁丑晦
揚州市火燔民舍數千家會昌元年五月潞州市火三年六月西
內神龍寺火萬年縣東市火焚廬舍甚衆六年八月葬武宗辛未
靈駕次三原縣夜大風行宮幔城火乾符四年十月東都聖善寺
火大順二年六月乙酉幽州市樓災延及數百步七月癸丑甲夜
汴州相國寺佛閣災是日暮微雨震電或見有赤塊轉門譙藤網
中周而火作頃之赤塊北飛轉佛閣藤網中亦周而火作既而大

雨暴至平地水深數尺火益甚延及民居三日不滅常燠天寶元年冬無冰先儒以爲陰失節也又曰知罪不誅其罰燠夏則暑殺人冬則物華實蓋當寒反燠象宜刑而賞之也貞元十四年夏大燠元和九年六月大燠長慶二年冬少雪水不冰凍草木萌莢如正月廣明元年十一月暖如仲春草妖武德四年益州獻芝草如人狀占曰王德將衰下人將起則有木生爲人狀草亦木類也景龍二年岐州郿縣民王上賓家有苦蕒菜高三尺餘上廣尺餘厚二分近草妖也三年內出蒜條上重生蒜蒜惡草也重生者其類衆也四年京畿藍田山竹實如麥占曰大饑開元二年終南山竹有華實如麥嶺南亦然竹並枯死是歲大饑民採食之占曰國中竹栢枯不出三年有喪十七年睦州竹實天寶初臨川郡人李嘉胤屋柱生芝草狀如天尊像上元二年七月甲辰延英殿御座上

生白芝一莖三花白喪象也大和九年冬鄭注之金帶有菌生近草妖也開成四年六月襄州山竹有實成米民採食之光啓元年七月河中解永樂生草葉自相膠結如旌旗之狀時人以爲旗子草二年七月鳳翔麟游草生如旗狀占曰其野有兵羽蟲之孽武德初隋將堯君素守蒲州有鵲巢其砲機貞觀十七年春齊王祐爲齊州刺史好畜鴨有狸嚙鴨頭斷者四十餘是歲四月丙戌立晉王爲太子雌雉集太極殿前雄雉集東宮顯德殿前太極三朝所會也永徽四年宋州人蔡道基舍傍有獸高丈餘頭類羊一角鹿形馬蹄牛尾五色有翅占曰鳥如畜形者有大兵五年七月辛巳萬年宮有小鳥如雀生子大如鳴鳩調露元年鳴鷄羣飛入塞相繼蔽野至二年正月還復北飛至靈夏北悉墮地而死視之皆無首文明後天下屢奏雌雞化爲雄或半化者景龍四年六月辛

巳朔鳥集太極殿梁驅之不去開元十三年十一月戊子雄雉馴
飛泰山齋宮內封禪所以告成功祀事無重於此者而野鳥馴飛
不忌禁衛不祥二十五年四月濮州兩鳥兩鵲兩鸚鵡同巢隴州
鵲哺慈鳥二十八年四月庚辰慈鳥巢宣政殿樞辛巳又巢宣政
殿拱天寶十三載葉縣有鵲巢于車轍中不巢木而巢地失其所
也至德二載三月安祿山將武令珣圍南陽有鵲巢于城中砲機
者三雛成乃去大曆八年九月武功獲大鳥肉翅狐首四足有瓜
長四尺餘毛赤如蝙蝠羣鳥隨而噪之近羽蟲孽也十三年五月
左羽林軍有鸚鵡乳鵲二貞元四年三月中書省梧桐樹有鵲以
泥爲巢鵲巢知歲次於羽蟲爲有知今以泥露巢遇風雨壞矣是
歲夏鄭汴境內鳥皆羣飛集魏博田緒淄青李納境內銜木爲城
高二三尺方十里緒納惡而焚之信宿又然鳥口皆流血九年春

許州鵲哺鳥雛十年四月有大鳥飛集宮中食雜骨數日獲之不
食死六月辛未晦水鳥集左藏庫十三年十月懷州鷓鴣巢內有
黃雀往來哺食十四年秋有異鳥色青類鳩鵲見於宋州郊外所
止之處羣鳥翼衛朝夕噉稻梁以哺之睢陽人適野聚觀者旬日
十八年六月鳥集徐州之滕縣噉柴爲城中有白鳥一碧鳥一元
和元年常州鵲巢于平地四年十二月羣鳥夜集于太行山上十
三年春淄青府署及城中鳥鵲互取其雛各以哺子更相搏擊不
能禁寶曆元年十一月丙申羣鳥夜鳴開成元年閏五月丙戌鳥
集唐安寺逾月散雀集玄法寺鷲集蕭望之冢二年三月真興門
外鵲巢於古冢鵲巢知避歲而古占又以高下卜水旱今不巢于
木而穴于冢不祥秋突厥鳥自塞北羣飛入塞五年六月有禿鷲
羣飛集禁苑鵲水鳥也會昌元年潞州長子有白頸鳥與鵲鬪大

中十年三月舒州吳塘堰有衆禽成巢闊七尺高一尺水禽山鳥無不馴狎中有如人面綠毛紺爪黃者其聲曰甘人謂之甘蟲占曰有鳥非常來宿于邑中國有兵人相食咸通七年涇州靈臺百里戍有雀生鷺至大俱飛去京房易傳曰賊臣在國厥妖鷺生雀雀生鷺同說十一年夏雉集河內縣署咸通中吳越有異鳥極大四目三足鳴山林其聲曰羅平占曰國有兵人相食乾符四年春廬江縣北鵲巢于地六年夏鷓雉集于偃師南樓及縣署劉向說野鳥入處宮室將空廣明元年春絳州翼城縣有鵠鷓鳥羣飛集縣署衆鳥逐而噪之光啓元年二月復如之鵠鷓一名訓狐中和元年三月陳留有鳥變爲鵲二年有鵲變爲鳥古者以鳥卜軍之勝負鳥變爲鵲民從賊之象鵲復變爲鳥賊復爲民之象三年新安縣吏家捕得雉養之與雞馴月餘相與鬪死四年臨淮漣水民

家鷹化爲鵝而弗能游鷹以鷺而擊武臣象也鵝雖毛羽清潔而飛不能遠無搏擊之用充庖廚而已光啓元年十二月陝州平陸集津山有雉二首向背而連頸者棲集津倉廡後數月羣雉數百來鬪殺之二年正月閩鄉湖城野雉及鳶夜鳴七月中條山鵲焚其巢三年七月鵲復焚巢京房易傳曰人君暴虐鳥焚其舍三年十月慈州作城梟與鷓鬪相殺光化二年幽州節度使劉仁恭屠貝州去夜有鵠鷓鳥十數飛入帳中逐去復來昭宗時有禿鷺鳥巢寢殿隅帝觀射殺之天復二年帝在鳳翔十一月丁巳日南至夜驟風有鳥數千迄明飛噪數日不止自車駕在岐常有鳥數萬棲殿前諸樹岐人謂之神鴉三年宣州有鳥如雉而大尾有火光如散星集于戟門明日大火曹局皆盡惟兵械在羊禍義寧二年三月丙辰麟游縣有羔生而無尾是月乙丑太原獻殺羊無頭而

不死開元二年正月原州獻肉角羊二年三月富平縣有肉角羊
會昌二年春代州崞縣羊生二首連頸兩尾占曰二首上不一也
咸通三年夏平陶民家羊生羔如犢乾符二年洛陽建春門外因
暴雨有物墮地如殺羊不食頃之入地中其跡月餘不滅或以爲
雨工也占曰當旱赤眚赤祥武德七年河間王孝恭征輔公祏宴
羣帥于舟中孝恭以金盃酌江水將飲之則化爲血孝恭曰盃中
之血公祏授首之祥武德初突厥國中雨血三日光宅初宗室岐
州刺史崇真之子橫杭等夜宴忽有氣如血腥武后時來俊臣家
井水變赤如血井中夜有吁嗟歎惋聲俊臣以木棧之木忽自投
十步外長安中并州晉祠水赤如血中宗時成王千里家有血點
地及奩廂上有血淋漓腥聞數步又中郎將東夷人毛婆羅炊飯
一夕化爲血景龍二年七月癸巳赤氣際天光燭地三日乃止赤

氣血祥也天寶六載少陵原楊慎矜父墓封域內草木皆流血慎
矜令浮圖史敬思禳之退朝裸而桎梏於叢棘間如是數旬而流
血不止十二載李林甫第東北隅每夜火光起或有如小兒持火
出入者近赤祥也寶應元年八月庚午夜有赤光亘天貫紫微漸
移東北彌漫半天大曆十二年二月太僕寺有泥像左臂上有黑
汗滴下以紙承之血也貞元二年十一月壬午日沒有赤氣五出
于黑雲中亘天十二年九月癸卯夜有赤氣如火見北方上至北
斗十七年福州劔池水赤如血二十一年正月甲戌雨赤雪于京
師元和十四年二月鄆州從事院門前地有血方尺餘色甚鮮赤
不知所從來人以爲自空而墮也長慶元年七月戊午河水赤三
日止寶曆元年十二月乙酉夜西北有霧起須臾遍大霧止有赤
氣或淺或深久而乃散大和元年四月庚戌北方有赤氣中有數

白氣間之六月乙卯夜西北有赤氣八月癸卯京師見赤氣滿天
二年閏三月乙卯北方有赤氣如血咸通七年鄭州永福湖水赤
如凝血者三日乾符六年中書政事堂忽旦有死人血污滿地不
知主名又御井水色赤而腥渫之得一死女子腐爛近赤祥也中
和二年七月丙午夜西北方赤氣如絳際天光啓元年正月潤州
江水赤凡數日水沴火幽州坊谷地常有火長慶三年夏遂積水
爲池近水沴火也

五行志第二十四

終

魏川生鳳崗
氏圖國周中

唐書二十四

五行志第二十五

魏川生鳳崗
氏圖國周中

唐書三十五

五行傳曰治宮室飾臺榭內淫亂犯親戚侮父兄則稼穡不成謂
土失其性則有水旱之災草木百穀不熟也又曰思心不睿是謂
不聖厥咎霧厥罰常風厥極凶短折時則有脂夜之妖時則有華
孽羸蟲之孽時則有牛禍時則有心腹之疴時則有黃眚黃祥時
則有木火金水沴土稼穡不成貞觀元年關內饑總章二年諸州
四十餘饑關中尤甚儀鳳四年春東都饑調露元年秋關中饑永
隆元年冬東都饑永淳元年關中及山南州二十六饑京師人相
食垂拱三年天下饑大足元年春河南諸州饑景龍二年春饑三
年三月饑先天二年冬京師岐隴幽州饑開元十六年河北饑乾
元三年春饑米斗錢千五百廣德二年秋關輔饑米斗千錢永泰
元年饑京師米斗千錢貞元元年春大饑東都河南河北米斗千

錢死者相枕二年五月麥將登而雨霖斗米千錢十四年京師及河南饑十九年秋關輔饑元和七年春饑八年廣州饑九年春關內饑十一年東都陳許州饑長慶二年江淮饑大和四年河北及太原饑六年春劔南饑九年春饑河北尤甚開成四年温台明等州饑大中五年冬湖南饑六年夏淮南饑海陵高郵民於官河中漉得異米號聖米九年秋淮南饑咸通三年夏淮南河南饑九年秋江左及關內饑東都尤甚乾符三年春京師饑中和二年關內大饑四年關內大饑人相食光啓二年二月荆襄大饑米斗三千錢人相食三年揚州大饑米斗萬錢大順二年春淮南大饑天祐元年十月京師大饑常風武德二年十二月壬子大風拔木易巽爲風重巽以申命其及物也象人君誥命其鼓動於天地間有時飛沙揚塵怒也發屋拔木者怒甚也其占大臣專恣而氣盛衆逆

同志君行蒙暗施於事則皆傷害故常風又飄風入宮闕一日再三若風聲如雷觸地而起爲兵將興貞觀十四年六月乙酉大風拔木咸亨四年八月己酉大風落太廟鴟尾永隆二年七月雍州大風害稼弘道元年十二月壬午晦宋州大風拔木嗣聖元年四月丁巳寧州大風拔木垂拱四年十月辛亥大風拔木永昌二年五月丁亥大風拔木神龍元年三月乙酉睦州大風拔木崔玄暉封博陵郡王也大風折其輅蓋二年六月乙亥滑州大風拔木景龍元年七月郴州大風發屋拔木八月宋州大風拔木壞廬舍二年十月辛亥滑州暴風發屋三年三月辛未曹州大風拔木開元二年六月京師大風發屋大木拔者十七八四年六月辛未京師陝華大風拔木九年七月丙辰揚州潤州暴風雨發屋拔木十四年六月戊午大風拔木發屋端門鴟尾盡落端門號令所從

出也十九年六月乙酉大風拔木二十二年五月戊子大風拔木
天寶十一載五月甲子東京大風拔木十三載三月辛酉大風拔
木永泰元年三月辛亥大風拔木大曆七年五月乙酉大風拔木
十年五月甲寅大風拔木貞元元年七月庚子大風拔木六年四
月甲申大風雨八年五月己未暴風發太廟屋瓦毀門闕官署廬
舍不可勝紀十年六月辛未大風拔木十四年八月癸未廣州大
風壞屋覆舟元和元年六月丙申大風拔木三年四月壬申大風
毀舍元殿欄檻二十七間占爲兵起四年十月壬午天有氣如煙
臭如燔皮日眙大風而止五年三月丙子大風毀崇陵上宮衙殿
鴟尾及神門戟竿六壞行垣四十間八年六月庚寅京師大風雨
毀屋飄瓦人多壓死者丙申富平大風拔棗木千餘株十二年春
青州一夕暴風自西北天地晦冥空中有若旌旗狀屋瓦上如蹂

躑聲有日者占之曰不及五年茲地當大殺戮長慶二年正月己
酉大風霾十月夏州大風飛沙爲堆高及城堞三年正月丁巳朔
大風昏霾終日四年六月庚寅大風毀延喜門及景風門大和八
年六月癸未暴風壞長安縣署及經行寺塔九年四月辛丑大風
拔木萬株墮舍元殿四鴟尾拔殿廷樹三壞金吾仗舍發城門樓
觀內外三十餘所光化門西城十數雉壞開成三年正月戊辰大
風拔木五年四月甲子大風拔木五月壬寅亦如之七月戊寅亦
如之會昌元年三月黔南大風飄瓦咸通六年正月絳州大風拔
木有十圍者十一月己卯晦潼關夜中大風山如吼雷河噴石鳴
羣鳥亂飛重關傾側十二月大風拔木乾符五年五月丁酉大風
拔木廣明元年四月甲申京師及東都汝州雨雹大風拔木四年
六月乙巳太原大風雨拔木千株害稼百里光化三年七月乙丑

洛州大風拔木發屋天復二年昇州大風發屋飛大木夜妖大和九年十一月戊辰晝晦咸通七年九月辛卯朔天闇乾符二年二月宣武境內黑風雨土天祐元年閏四月乙未朔大風雨土華孽也傳曰天反時爲災又近常燠也神龍二年十月陳州李有華鮮茂如春元和十一年十二月桃杏華大和二年九月徐州滑州李有華實可食會昌三年冬沁源桃李華廣明元年冬桃李華山華皆發中和二年九月太原諸山桃杏華有實景福中滄州城壑中冰有文如畫大樹華葉芬敷者時人以爲其地當有兵難近華孽也羸蟲之孽貞觀二十一年八月萊州螟開元二十二年八月榆關蚜蝻蟲害稼入平州界有羣雀來食之一日而盡二十六年榆關蚜蝻蟲害稼羣雀來食之三載青州紫蟲食田有鳥食之廣德

元年秋蚜蝻蟲害稼關中尤甚米斗千錢貞元十年四月江西溪澗魚頭皆戴蚯蚓長慶四年絳州蚜蝻蟲害稼大和元年秋河東同虢等州蚜蝻蟲害稼開成元年京城有蟻聚長五六十步濶五尺至一丈厚五寸至一尺者四年河南黑蟲食田牛禍調露元年春牛大疫京房易傳曰牛少者穀不成又占曰金革動長安中有獻牛無前膊三足而行者又有牛膊上生數足蹄甲皆具者武太后從姊之子司農卿宗晉卿家牛生三角神龍元年春牛疫二年冬牛大疫先天初洛陽市有牛左脇有人手長一尺或牽之以乞丐開元十五年春河北牛大疫大曆八年武功櫟陽民家牛生犢二首貞元二年牛疫四年二月郊牛生犢六足足多者下不一郊所以奉天七年關輔牛大疫死者十五六咸通七年荊州民家牛生犢五足十五年夏渝州江陽有水牛生驢駒駒死光啓元年河

東有牛人言其家殺而食之二年延州膚施有牛死復生黃皆黃
祥貞觀七年三月丁卯雨土二十年閏三月巳酉有黃雲闊一丈
東西際天黃爲土功永徽三年三月辛巳雨土景龍元年六月庚
午陝州雨土十二月丁丑雨土天寶十三載二月丁丑雨黃土大
曆七年十一月丙寅雨土貞元二年四月甲戌雨土八年二月庚
子雨土大和八年十月甲子土霧晝昏至于十一月癸丑開成元
年七月乙亥雨土咸通十四年三月癸巳雨黃土中和二年五月
辛酉大風雨土天復三年二月雨土天地昏霾天祐元年閏四月
甲辰大風雨土木火金水沴土武德二年十月乙未京師地震陰
盛而反常則地震故其占爲臣彊爲后妃專恣爲夷犯華爲小人
道長爲寇至爲叛臣七年七月嵩州地震山摧壅江水噎流貞觀
七年十月乙丑京師地震十二年正月壬寅松叢二州地震壞廬

舍二十年九月辛亥靈州地震有聲如雷二十三年八月癸酉朔
河東地震晉州尤甚壓殺五十餘人乙亥又震十一月乙丑又震
永徽元年四月巳巳朔晉州地震巳卯又震六月庚辰又震有聲
如雷二年十月又震十一月戊寅定襄地震帝始封晉王初卽位
而地屢震天下將由帝而動搖象也儀鳳二年正月庚辰京師地
震永淳元年十月甲子京師地震垂拱三年七月乙亥京師地震
四年七月戊午又震八月戊戌神都地震延載元年四月壬戌常
州地震大足元年七月乙亥楊楚常潤蘇五州地震二年八月辛
亥劔南六州地震景龍四年五月丁丑剡縣地震景雲二年正月
甲戌并汾絳三州地震壞廬舍壓死百餘人開元二十二年二月
壬寅秦州地震西北隱隱有聲拆而復合經時不止壞廬舍殆盡
壓死四千餘人二十六年三月癸巳京師地震至德元載十一月

辛亥朔河西地震裂有聲陷廬舍張掖酒泉尤甚至二載三月癸亥乃止大曆二年十一月壬申京師地震自東北來其聲如雷者三年五月丙戌又震十二年恒定二州地大震三日乃止東鹿寧晉地裂數丈沙石隨水流出平地壞廬舍壓死者數百人建中元年四月巳亥京師地震三年六月甲子又震四年四月甲子又震五月辛巳又震貞元二年五月巳酉又震三年十一月丁丑夜京師東都蒲陝地震四年正月庚戌朔夜京師地震辛亥壬子丁卯戊辰庚午癸酉甲戌乙亥皆震金房二州尤甚江溢山裂屋宇多壞人皆露處二月壬午京師又震甲申乙酉丙申三月甲寅巳未庚午辛未五月丙寅丁卯皆震八月甲午又震有聲如雷甲辰又震九年四月辛酉又震有聲如雷河中關輔尤甚壞城壁廬舍地裂水涌十年四月戊申京師地震癸丑又震侍中渾瑊第有樹湧

出樹枝皆戴蚯蚓十三年七月乙未又震元和七年八月京師地震草樹皆搖九年三月丙辰雋州地震晝夜八十壓死百餘人地陷者三十里十年十月京師地震十一年二月丁丑又震十五年正月穆宗卽位戊辰始朝羣臣於宣政殿是夜地震大和二年正月壬申地震七年六月甲戌又震九年三月乙卯京師地震屋瓦皆墜戶牖間有聲開成元年二月乙亥又震二年十一月乙丑夜又震四年十一月甲戌又震會昌二年正月癸亥宋亳二州地震十二月癸未京師地震大中三年十月辛巳上都及振武河西天德靈武鹽夏等州地震壞廬舍壓死數十人十二年八月丁巳太原地震咸通元年五月上都地震六年十二月晉絳二州地震壞廬舍地裂泉湧泥出青色八年正月丁未河中晉絳三州地大震壞廬舍人有死者十三年四月庚子朔浙東西地震乾符三年六

月乙丑雄州地震至七月辛巳止州城廬舍盡壞地陷水湧傷死甚衆是月濮州地震十二月京師地震有聲四年六月庚寅雄州地震六年二月京師地震有聲如雷藍田山裂水湧中和三年秋晉州地震有聲如雷光啓二年春成都地震月中十數占曰兵饑十二月魏州地震乾寧二年三月庚午河東地震山摧貞觀八年七月隴右山摧山者高峻自上而墮之象也垂拱二年九月巳巳雍州新豐縣露臺鄉大風雨震電有山湧出高二十丈有池周三百畝池中有龍鳳之形米麥之異武后以爲休應名曰慶山荊州人俞文俊上言天氣不和而寒暑隔人氣不和而贅疣生地氣不和而堆阜出今陛下以女主居陽位反易剛柔故地氣隔塞山變爲災陛下以爲慶山臣以爲非慶也宜側身修德以答天譴不然恐災禍至后怒流于嶺南永昌中華州赤水南岸大山晝日忽風

昏有聲隱隱如雷頃之漸移東數百步擁赤水壓張村民三十餘家山高二百餘丈水深三十丈坡上草木宛然金滕曰山徙者人君不用道祿去公室賞罰不由君佞人執政政在女主不出五年有走王開元十七年四月乙亥大風震電藍田山摧裂百餘步畿內山也國主山川山摧川竭亡之證也占曰人君德消政易則然大曆九年十一月戊戌同州夏陽有山徙于河上聲如雷十三年郴州黃岑山摧壓死者數百人建中二年霍山裂元和八年五月丁丑大隗山摧十五年七月丁未苑中土山摧壓死二十人光啓三年四月維州山崩累日不止塵盆亘天壅江水逆流占曰國破山鳴武德二年三月太行山聖人崖有聲占曰有寇至開元二十年六月吐蕃圍安戎城斷水路城東山鳴石圻湧泉二土爲變怪垂拱元年九月淮南地生毛或白或蒼長者尺餘遍居人牀下

揚州尤甚大如馬鬣焚之臭如燎毛占曰兵起民不安長壽中東都天宮寺泥像皆流汗霖霖天寶十一載六月虢州閿鄉黃河中女蝸墓因大雨晦冥失其所在至乾元二年六月乙未夜瀕河人聞有風雷聲曉見其墓踊出下有巨石上有雙柳各長丈餘時號風陵堆占曰塚墓自移天下破十三載汝州葉縣南有土塊鬪中有血出數日不止大曆六年四月戊寅藍田西原地陷建中初魏州魏縣西四十里地數畝忽長崇數尺四年四月甲子京師地生毛或黃或白有長尺餘者貞元四年四月淮南及河南地生毛元和十二年四月吳元濟鄆城守將鄧懷金以城降城自壞五十餘步大和六年二月蘇州地震生白毛長慶中新都大道觀泥人生須數寸拔之復生咸通五年十月貞陵隧道摧陷神策軍有浮屠像懿宗嘗跪禮之像沒地四尺五行傳曰好攻戰輕百姓飾城郭

侵邊境則金不從革謂金失其性而爲變怪也又曰言之不從是謂不义厥咎僭厥罰常暘厥極憂時則有詩妖訛言時則有毛蟲之孽時則有犬禍時則有口舌之病時則有白青白祥惟木沴金金不從革堯君素爲隋守蒲州兵器夜皆有光如火火鑠金金所畏也敗亡之象劉武周據并州兵勢甚盛城上稍刀夜每有火光貞觀十七年八月涼州昌松縣鴻池谷有石五青質白文成字曰高皇海出多子李元王八十年太平天子李世民千年太子李治書燕山人士樂太國王尚汪譚獎文仁邁千古大王五王六王七王十風毛才子七佛八菩薩及上果佛田天子文武貞觀昌大聖延四方上不治示孝仙戈八爲善太宗遣使祭之曰天有成命表瑞貞石文字昭然曆數惟永旣旌高廟之業又錫眇身之祚迨于皇太子治亦降貞符具紀姓氏甫惟寡薄彌增寅懼昔魏以土德

代漢涼州石有文石金類以五勝推之故時人謂爲魏氏之妖而
晉室之瑞唐亦土德王石有文事頗相類然其文初不可曉而後
人因推已事以驗之蓋武氏革命自以爲金德王其佛菩薩者慈
氏金輪之號也樂太國主則鎮國太平公主安樂公主皆以女亂
國其五王六王七王者唐世十八之數垂拱三年七月魏州地出
鐵如船數十丈廣州兩金金位正秋爲刑爲兵占曰人君多殺無
辜一年兵災于朝開元二十三年十二月乙巳龍池聖德頌石自
鳴其音清遠如鐘磬石與金同類春秋傳怨讟動于民則有非言
之物言石鳴近石言也天寶十載六月乙亥大同殿前鐘自鳴占
曰庶雄爲亂至德二載昭陵石馬汗出昔周武帝之克晉州也齊
有石像汗流濕地此其類也乾元二年七月乙亥晝渾天儀有液
如汗下流上元二年楚州獻寶玉十三曰玄黃天符形如笏長八

寸有孔云辟兵疫曰玉雞毛白玉也曰穀壁亦白玉也粟粒自然
無雕鑄迹曰西王母白環二曰如意寶珠大如雞卵曰紅韎鞞大
如巨粟曰琅玕珠二形如玉環四分缺一曰玉印大如半手理如
鹿陷入印中曰皇后採桑鉤如箸屈其末曰雷公石斧無孔其一
闕凡十三寘之日中白氣連天元和中文水武士護碑失其龜頭
翰林院有鈴夜中文書人則引之以代傳呼長慶中河北用兵夜
輒自鳴與軍中息耗相應聲急則軍事急聲緩則軍事緩資州有
石方丈走行數畝大和三年南蠻圍成都毀玉晨殿爲礪有吼聲
三乃止四年五月巳卯通化南北二門鑰不可開鑰入如有持之
者破其管門乃啓又浙西觀察使王璠治潤州城隍中得方石有
刻文曰山有石石有玉玉有瑕瑕卽休廣明元年華岳廟玄宗御
製碑隱隱然有聲聞數里間決旬乃止近石言也光化三年冬武

德殿前鐘聲忽嘶，嗟天復元年九月聲又變小。常暘武德三年夏旱，至于八月乃雨。四年自春不雨，至于七月雨少，陰之氣其氣毀，則不雨。少陰者金也，金爲刑，爲兵，刑不辜，兵不戢，則金氣毀，故常爲旱。火爲盛陽，陽氣彊悍，故聖人制禮以節之，禮失則僭而驕，炕以導盛陽，火勝則金衰，故亦旱於五行。土實制水，土功興則水氣壅闕，又常爲旱。天官有東井主水事，天漢天江亦水祥也。水與火仇而受制于土，土火謫見，若日蝕過分而未至，與七曜循中道之南皆旱祥也。七年秋關內河東旱，貞觀元年夏山東大旱，二年春旱，三年春夏旱，四年春旱，自太上皇傳位至此而比年水旱。九年秋劔南關東州二十四旱，十二年吳楚巴蜀州二十六旱，冬不雨。至于明年五月十七年春夏旱，二十一年秋陝絳蒲夔等州旱，二十二年秋開萬等州旱，冬不雨。至于明年三月永徽元年京畿雍

同絳等州大旱，二年九月不雨，至于明年二月四年夏秋旱，光葵滁潁等州尤甚，顯慶五年春河北州二十二旱，總章元年京師及山東江淮大旱，二年七月劔南州十九旱，冬無雪，咸亨元年春旱，秋復大旱，儀鳳二年夏河南河北旱，三年四月旱，永隆二年關中旱，霜大饑，永淳元年關中大旱，饑，二年夏河南河北旱，永昌元年三月旱，神功元年黃隋等州旱，久視元年夏關內河東旱，長安二年春不雨，至于六月三年冬無雪，至于明年二月神龍二年冬不雨，至于明年五月京師山東河北河南旱，饑太極元年春旱，七月復旱，開元二年春大旱，十二年七月河東河北旱，帝親禱雨，宮中設壇，席暴立三日，九月蒲同等州旱，十四年秋諸道州十五旱，十五年諸道州十七旱，十六年東都河南宋亳等州旱，二十四年夏旱，永泰元年春夏旱，二年關內大旱，自三月不雨，至于六月大曆

六年春旱至于八月建中三年自五月不雨至于七月興元元年冬大旱貞元元年春旱無麥苗至于八月旱甚灞澇將竭井皆無水六年春關輔大旱無麥苗夏淮南浙西福建等道大旱井泉竭人嗚且死者甚衆七年楊楚滌壽澧等州旱十四年春旱無麥十五年夏旱十八年夏申光蔡州旱十九年正月不雨至七月甲戌乃雨永貞元年秋江浙淮南荆南湖南鄂岳陳許等州二十六早元和三年淮南江南江西湖南廣南山南東西皆旱四年春夏大旱秋淮南浙西江東旱七年夏揚潤等州旱八年夏同華二州旱十五年夏旱寶曆元年秋荆南淮南浙西江西湖南及宣襄鄂等州旱大和元年夏京畿河中同州旱六年河東河南關輔旱七年秋大旱八年夏江淮及陝華等州旱九年秋京兆河南河陝華同等州旱開成二年春夏旱四年夏旱浙東尤甚會昌五年

春旱六年春不雨冬又不雨至明年二月大中四年大旱咸通二年秋淮南河南不雨至于明年六月九年江淮旱十年夏旱十一年夏旱廣明元年春夏大旱中和四年江南大旱饑人相食景福二年秋大旱光化三年冬京師旱至于四年春詩妖竇建德未敗時有謠曰豆入牛口勢不得久貞觀十四年交河道行軍大總管侯君集伐高昌先是其國中有童謠曰高昌兵馬如霜雪漢家兵馬如日月日月照霜雪回首自消滅永徽後民歌武媚娘曲調露初京城民謠有側堂堂橈堂堂之言太常丞李嗣真曰側者不正橈者不安自隋以來樂府有堂堂曲再言堂者唐再受命之象永淳九年七月東都大雨人多殍殍先是童謠曰新禾不入箱新麥不入場迨及八九月狗吠空垣墻高宗自調露中欲封嵩山屬突厥叛而止後又欲封以吐蕃入寇遂停時童謠曰嵩山凡幾層不

畏登不得但恐不得登三度徵兵馬傍道打騰騰永徽末里歌有
桑條葦也女時葦也樂龍朔中時人飲酒令曰子母相去離連臺
拗倒俗謂杯盤爲子母又名盤爲臺又里歌有突厥鹽永淳後民
歌曰楊柳楊柳漫頭駝垂拱後東都有契苾兒歌皆淫豔之詞契
苾張易之小字也如意初里歌曰黃鸞黃鸞草裏藏彎弓射爾傷
其後王孝傑敗於黃鸞谷神龍以後民謠曰山南烏鵲窠山北金
駱駝鏹柯不鑿孔斧子不施柯山南唐也烏鵲窠者人居寡也山
北胡也金駱駝者虜獲而重載也安樂公主於洛州造安樂寺童
謠曰可憐安樂寺了了樹頭懸景龍中民謠曰黃犢子挽紉斷
兩足踏地鞦韆斷城南黃犢子葦又有阿緯娘歌時又謠曰可
憐聖善寺身著綠毛衣葦來河裏飲踏殺鯉魚兒玄宗在潞州有
童謠曰羊頭山北作朝堂天寶中有術士李遐周於玄都觀院廡

間爲詩曰燕市人皆去函關馬不歸人逢山下鬼環上繫羅衣而
人皆不悟近詩妖也又祿山未反時童謠曰燕燕飛上天天上女
兒鋪白氈氈上有千錢時幽州又有謠曰舊來誇戴竿今日不堪
看但看五月裏清水河邊見契丹德宗時或爲詩曰此水連涇水
雙眸血滿川青牛逐朱虎方號太平年近詩妖也朱泚未敗前兩
月有童謠曰一隻筋兩頭朱五六月化爲胆元和初童謠曰打麥
打麥三三三乃轉身曰舞了也大中末京師小兒疊布漬水紐之
向日謂之曰拔暈咸通七年童謠曰草青青被嚴霜鵲始復看顛
狂十四年成都童謠曰咸通癸巳出無所之蛇去馬來道路稍開
頭無片瓦地有殘灰是歲歲陰在巳明年在午巳蛇也午馬也僖
宗時童謠曰金色蝦蟆爭努眼翻却曹州天下反乾符六年童謠
曰八月無霜寒草青將軍騎馬出空城漢家天下西巡狩猶向江

東更索兵中和初童謠曰黃巢走秦山東死在翁家翁訛言貞觀十七年七月民訛言官遣棖棖殺人以祭天狗云其來也身衣狗皮鐵爪每於闇中取人心肝而去於是更相震怖每夜驚擾皆引弓劔自防無兵器者剡竹為之郊外不敢獨行太宗惡之令通夜開諸坊門宣旨慰諭月餘乃止武后時民飲酒謳歌曲終而不盡者謂之族鹽開元二十七年十月改作東都明堂訛言官取小兒埋明堂下以為厭勝村野兒童藏于山谷都城騷然或言兵至玄宗惡之遣使慰諭久之乃止天寶三載二月辛亥有星如月墜于東南墜後有聲京師訛言官遣棖棖捕人取肝以祭天狗人頗恐懼畿內尤甚遣使安諭之與貞觀十七年占同天寶後詩人多為憂苦流寓之思及寄興于江湖僧寺而樂曲亦多以邊地為名有伊州甘州涼州等至其曲遍繁聲皆謂之入破又有胡旋舞本出

康居以旋轉便捷為巧時又尚之破者蓋破碎云建中三年秋江淮訛言有毛人食其心人情大恐朱泚既僭號名其舊第曰潛龍宮移內府珍貨以實之占者以為易稱潛龍勿用此敗祥也大和九年京師訛言鄭注為上合金丹生取小兒心肝密旨捕小兒無算往往陰相告曰某處失幾兒矣方士言金丹可致神仙蓋誕妄不經之語或信而服之則發熱多死如有所戒云小兒無辜者取其心肝將有殺戮象劉從諫未死時潞州有狂人折腰於市曰石雄七千人至矣從諫捕斬之咸通十四年秋成都訛言有狹母鬼夜入人家民皆恐夜則聚坐或曰某家見鬼眼晃然如燈焰民益懼黃巢未入京師時都人以黃米及黑豆屑蒸食之謂之黃賊打黑賊僖宗時里巷鬪者激怒言任見右廂天子毛蟲之孽永徽中河源軍有狼三晝入軍門射之斃永淳中嵐勝兎害稼千萬為羣

食苗盡兔亦不復見開元三年有熊晝入揚州城乾元二年十月
 詔百官上勤政樓觀安西兵赴陝西有狐出于樓上獲之大曆四
 年八月巳卯虎入京師長壽坊宰臣元載家廟射殺之虎西方之
 屬威猛吞噬刑戮之象六年八月丁丑獲白兔于大極殿之內廊
 占曰國有憂白喪祥也建中三年九月巳亥夜虎入宣陽里傷人
 二詰朝獲之貞元二年二月乙丑有野鹿至于含元殿前獲之壬
 申又有鹿至于含元殿前獲之占曰有大喪四年三月癸亥有鹿
 至京師西市門獲之開成四年四月有麀出于太廟獲之犬禍武
 德三年突厥處羅可汗將入寇夜聞犬羣嗥而不見犬武后初酷
 吏丘神勣家狗生子皆無首當項有孔如口晝夜鳴吠俄失所在
 神功元年安國獻兩首犬首多者上不一也天寶十一載李林甫
 晨起盥飾將朝取書囊視之中有物如鼠躍於地即變為狗壯大

雄目張牙視林甫林甫射之中殺然有聲隨箭沒貞元七年趙州
 栢鄉民李崇貞家黃犬乳犢會昌二年定州深澤令家狗生角大
 中初狗生角京房曰執正失將害之應又曰君子危陷則狗生角
 咸通中會稽有狗生而不能吠擊之無聲狗職吠以守禦其不能
 者象鎮守者不能禦寇之兆成汭為荆南節度使城中犬皆夜吠
 日者向隱以為城郭將丘墟中和二年秋丹徒狗與彘交占曰諸
 侯有謀害國者白青白祥調露元年十一月壬午秦州神亭治北
 霧開如日初耀有白鹿白狼見近白祥也神龍二年四月巳亥雨
 毛于越州之鄞縣占曰邪人進賢人遁大曆二年七月甲戌日入
 時有白氣亘天貞元二十年九月庚辰甲夜有白氣八東西際天
 大和三年八月西方有白氣如柱七年十月巳酉西方又有白氣
 如柱者三光啓二年四月有白氣頭黑如髮自東南入于揚州滅

光化二年三月乙巳日中有白氣亘天自西南貫于東北天復元年八月巳亥西方有白雲如履底中出白氣如匹練長五丈上衝天分爲三彗頭下垂占曰天下有兵白者戰祥也木沴金神龍中東都白馬寺鐵像頭無故自落於殿門外天寶五載四月宰臣李適之常列鼎具膳羞中夜鼎躍出相鬪不解鼎耳及足皆折

五行志第二十五 終

齊川中鳳臺
氏雷而南由

唐書

五行志第二十六

齊川中鳳臺
氏雷而南由

唐書三十六

五行傳曰簡宗廟不禱祠廢祭祀逆天時則水不潤下謂水失其性百川逆溢壞鄉邑溺人民而爲災也又曰聽之不聰是謂不謀厥咎急厥罰常寒厥極貧時則有鼓妖時則有豕禍時則有耳痲時則有雷電霜雪雨雹黑青黑祥惟火沴水水不潤中貞觀三年秋貝譙鄆泗沂徐豪蘇隴九州水水太陰之氣也若臣道顯女謁行夷狄彊小人道長嚴刑以逞下民不堪其憂則陰類勝其氣應而水至其謫見于天月及辰星與列星之司水者爲之變若七曜循中道之北皆水祥也四年秋許戴集三州水七年八月山東河南州四十大水八年七月山東江淮大水十年關東及淮海旁州二十八大水十一年七月癸未黃氣際天大雨穀水溢入洛陽宮深四尺壞左掖門毀官寺十九洛水漂六百餘家九月丁亥河溢

壞陝州之河北縣及太原倉毀河陽中渾十六年秋徐戴二州大水十八年秋穀襄豫荆徐梓忠縣宋亳十州大水十九年秋沁易二州水害稼二十一年八月河北大水泉州海溢驩州水二十二年夏瀘越徐交渝等州水永徽元年六月新豐渭南大雨零口山水暴出漂廬舍宜歛饒常等州大雨水溺死者數百人秋齊定等州十六水二年秋汴定濮亳等州水四年杭夔果忠等州水五年五月丁丑夜大雨麟遊縣山水衝萬年宮玄武門入寢殿衛士有溺死者六月河北大水滹沱溢損五千餘家六年六月商州大水秋冀沂密兗滑汴鄭婺等州水害稼洛州大水毀天津橋十月齊州河溢顯慶元年七月宣州涇縣山水暴出平地四丈溺死者二千餘人九月括州暴風雨海水溢壞安固永嘉二縣四年七月連州山水暴出漂七百餘家麟德二年六月鄜州大水壞居人廬舍

總章二年六月括州大風雨海溢壞永嘉安固二縣溺死者九千七十人冀州大雨水平地深一丈壞民居萬家咸亨元年五月丙戌大雨山水溢溺死五千餘人二年八月徐州山水漂百餘家四年七月婺州大雨山水暴漲溺死五千餘人上元三年八月青州大風海溢漂居人五千餘家齊淄等七州大水永隆元年九月河南河北大水溺死者甚衆二年八月河南河北大水壞民居十萬餘家永淳元年五月丙午東都連日澍雨乙卯洛水溢壞天津橋及中橋漂居民千餘家六月乙亥京師大雨水平地深數尺秋山東大雨水大饑二年七月巳巳河溢壞河陽橋八月恒州滹沱河及山水暴溢害稼文明元年七月溫州大水漂千餘家括州溪水暴漲溺死百餘人如意元年四月洛水溢壞永昌橋漂居民四百餘家七月洛水溢漂居民五千餘家八月河溢壞河陽縣長壽二

年五月棣州河溢壞居民二千餘家是歲河陽州十一水萬歲通
天元年八月徐州大水害稼神功元年三月括州水壞民居七百
餘家是歲河南州十九水聖曆二年七月丙辰神都大雨洛水壞
天津橋秋水溢懷州漂千餘家三年三月辛亥鴻州水漂千餘家
溺死四百餘人久視元年十月洛州水長安三年六月寧州大雨
水漂二千餘家溺死千餘人四年八月瀛州水壞民居數千家神
龍元年四月雍州同官縣大雨水漂民居五百餘家六月河北州
十七大水七月甲辰洛水溢壞民居二千餘家二年四月辛丑洛
水壞天津橋溺死數百人八月魏州水景龍三年七月澧水溢害
稼九月密州水壞民居數百家開元三年河南河北水四年七月
丁酉洛水溢沈舟數百艘五年六月甲申瀍水溢溺死者千餘人
鞏縣大水壞城邑損居民數百家河南水害稼八年夏契丹寇營

州發關中卒援之宿澠池之缺門營穀水上夜半山水暴至萬餘
人皆溺死六月庚寅夜穀洛溢入西上陽宮宮人死者十七八畿
內諸縣田稼廬舍蕩盡掌閑衛兵溺死千餘人京師興道坊一夕
陷爲池居民五百餘家皆沒不見是年鄧州三鴨口大水塞谷或
見二小兒以水相沃須臾有蛇大十圍張口仰天人或斫射之俄
而暴雨漂溺數百家十年五月辛酉伊水溢毀東都城東南隅
平地深六尺河南許仙豫陳汝唐鄧等州大水害稼漂沒民居溺
死者甚衆六月博州棣州河決十二年六月豫州大水八月兗州
大水十四年秋天下州五十水河南河北尤甚河及支川皆溢懷
衛鄭滑汴濮人或巢或舟以居死者千計潤州大風自東北海濤
没瓜步十五年五月晉州大水七月鄧州大水溺死數千人洛水
溢入鄜城平地丈餘死者無算壞同州城市及馮翊縣漂居民二

千餘家八月澗穀溢毀澠池縣是秋天下州六十三大水害稼及
 居人廬舍河北尤甚十七年八月丙寅越州大水壞州縣城十八
 年六月壬午東都瀍水溺楊楚等州租船洛水壞天津永濟二橋
 及民居千餘家十九年秋河南水害稼二十年秋宋滑兗鄆等州
 大水二十二年秋關輔河南州十餘水害稼二十七年三月澧表
 江等州水二十八年十月河南郡十三水二十九年七月伊洛及
 支川皆溢害稼毀天津橋及東西漕上陽宮仗舍溺死千餘人是
 秋河南河北郡二十四水害稼天寶四載九月河南淮陽睢陽譙
 四郡水十載廣陵大風駕海潮沈江口船數千艘十三載九月東
 郡瀍洛溢壞十九坊廣德元年九月大雨水平地數尺時吐蕃寇
 京畿以水自潰去二年五月東都大雨洛水溢漂二十餘坊河南
 諸州水大曆元年七月洛水溢二年秋湖南及河東河南淮南浙

東西福建等道州五十五水災七年二月江州江溢十年七月杭
 州海溢十一年七月戊子夜澍雨京師平地水尺餘溝渠漲溢壞
 民居千餘家十二年秋京畿及宋亳滑三州大雨水害稼河南尤
 甚平地深五尺河溢建中元年幽鎮魏博大雨易水滹沱橫流自
 山而下轉石折樹水高丈餘苗稼蕩盡貞元二年六月丁酉大風
 雨京城通衢水深數尺有溺死者東都河南荆南淮南江河溢三
 年三月東都河南江陵汴揚等州大水四年八月灞水暴溢殺百
 餘人八年秋自江淮及荆襄陳宋至于河朔州四十餘大水害稼
 溺死二萬餘人漂沒城郭廬舍幽州平地水深二丈徐鄭涿薊檀
 平等州皆深丈餘八年六月淮水溢平地七尺沒泗州城十一年
 十月朗蜀二州江溢十二年四月福建二州大水嵐州暴雨水深
 二丈十三年七月淮水溢于亳州十八年春申光蔡等州大水永

貞元年夏朗州之熊武五溪溢秋武陵龍陽二縣江水溢漂萬餘家京畿長安等九縣山水害稼元和元年夏荆南及壽幽徐等州大水二年六月蔡州大雨水平地深數尺四年十月丁未渭南暴水漂民居二百餘家六年七月鄜坊黔中水七年正月振武河溢毀東受降城五月饒撫虔吉信五州暴雨虔州尤甚平地有深至四丈者八年五月陳州許州大雨大隗山摧水流出溺死者千餘人六月庚寅大風毀屋揚瓦人多壓死京師大水城南深丈餘入明德門猶漸車輻辛卯渭水漲絕濟時所在百川發溢多不由故道滄州水潦浸鹽山等四縣九年秋淮南及岳安宣江撫袁等州大水害稼十一年五月京畿大雨水昭應尤甚衢州山水害稼深三丈毀州郭溺死百餘人六月密州大風雨海溢毀城郭饒州浮梁樂平二縣暴雨水漂沒四千餘戶潤常潮陳許五州及京畿水

害稼八月甲午渭水溢毀中橋十二年六月乙酉京師大雨水舍元殿一柱傾市中水深三尺毀民居二千餘家河南河北大水洛邢尤甚平地二丈河中江陵幽澤潞晉隰蘇台越州水害稼十三年六月辛未淮水溢十五年秋洪吉信倉等州水長慶二年七月河南陳許蔡等州大水好時山水漂民居三百餘家處州大雨水平地深八尺壞城邑桑田大半四年夏蘇湖二州大雨水太湖決溢睦州及壽州之霍山水暴出鄆曹濮三州雨水壞州城民居田稼略盡襄均復郢四州漢水溢決秋河南及陳許二州水害稼寶曆元年秋鄜坊二州暴雨兗海華三州及京畿奉天等六縣水害稼大和二年夏京畿及陳滑二州水害稼河陽水平地五尺河決壞棣州城越州大風海溢河南鄆曹濮淄青齊德兗海等州並大水三年四月同官縣暴雨漂沒二百餘家宋亳徐等州大水害

稼四年夏江水溢沒舒州太湖宿松望江三縣民田數百戶鄜坊水漂三百餘家浙西浙東宣歙江西鄜坊山南東道淮南京畿河南江南荆襄鄂岳湖南大水皆害稼五年六月玄武江漲高二丈溢入梓州羅城淮西浙東浙西荆襄岳鄂東川大水害稼六年二月蘇湖二州大水六月徐州大雨壞民居九百餘家七年秋浙西及揚楚舒廬壽滁和宣等州大水害稼八年秋江西及襄州水害稼蘄州湖水溢滁州大水溺萬餘戶開成元年夏鳳翔麟遊縣暴雨水毀九成宮壞民舍數百家死者百餘人七月鎮州滹沱河溢害稼三年夏河決浸鄭滑外城陳許鄜坊鄂曹濮襄魏博等州大水江漢漲溢壞房均荆襄等州民居及田產殆盡蘇湖處等州水溢入城處州平地八尺四年秋西川滄景淄青大雨水害稼及民廬舍德州尤甚平地水深八尺五年七月鎮州及江南水會昌元

年七月江南大水漢水壞襄均等州民居甚衆大中十二年八月魏博幽鎮兗鄆滑汴宋舒壽和潤等州水害稼徐泗等州水深五丈漂沒數萬家十三年夏大水咸通元年潁州大水四年閏六月東都暴水自龍門毀定鼎長夏等門漂溺居人七月東都許汝徐泗等州大水傷稼九月孝義山水深三丈破武牢關金城門汜水橋六年六月東都大水漂壞十二坊溺死者甚衆七年夏江淮大水秋河南大水害稼十四年八月關東河南大水乾符三年關東大水光化三年九月浙江溢壞民居甚衆乾寧三年四月河北于滑州朱全忠決其隄因爲二河散漫千餘里常寒顯慶四年二月壬子大雨雪方春少陽用事而寒氣脅之古占以爲人君刑法暴濫之象近常寒也咸亨元年十月癸酉大雪平地三尺人多凍死儀鳳三年五月丙寅高宗在九成宮霖雨大寒兵衛有凍死者開

耀元年冬大寒久視元年三月大雪神龍元年三月乙酉睦州暴寒且冰開元二十九年九月丁卯大雨雪大木偃折大曆四年六月伏日寒貞元元年正月戊戌大風雪寒丙午又大風雪寒民饑多凍死者十二年十二月大雪甚寒松栢柿樹多死占曰有德遭險厥災暴寒十九年三月大雪二十年二月庚戌始雷大雨雹震電大雨雪既雷則不當雪陰脅陽也如魯隱公之九年元和六年十二月大寒八年十月東都大寒霜厚數寸雀鼠多死十二年九月巳丑雨雪人有凍死者十五年八月巳卯同州雨雪害稼長慶元年二月海州海水冰南北二百里東望無際大和六年正月雨雪踰月寒甚九年十二月京師苦寒會昌三年春寒大雪江左尤甚民有凍死者咸通五年冬隰石汾等州大雨雪平地深五尺景福二年二月辛巳曹州大雪平地二尺天復三年三月浙西大雪

平地三尺餘其氣如烟其味苦十二月又大雪江海冰天祐元年九月壬戌朔大風寒如仲冬是冬浙東浙西大雪吳越地氣常燠而積雪近常寒也鼓妖武德三年二月丁丑京師西南有聲如崩山近鼓妖也說者以爲人君不聰爲衆所惑則有聲無形不知所從生天授元年九月檢校內史宗秦客拜日無雲而雷震近鼓妖也貞元十三年六月丙寅天晦街鼓不鳴中和二年十月西北方無雲而雷天復三年十月甲午有大聲出于宣武節度使廳事近鼓妖也魚孽如意中濟源路敬淳家水碾柱將壞易之爲薪中有鮎魚長尺餘猶生近魚孽也開元四年安南都護府江中有大蛇首尾橫出兩岸經日而腐寸寸自斷數日江魚盡死蔽江而下十五五相附著江水臭神龍中渭水有蝦蟆大如鼎里人聚觀數日而失是歲大水元和十四年二月晝有魚長尺餘墜於鄆州市

良久乃死魚失水而墜于市敗滅象也開成二年三月壬申有大魚長六丈自海入淮至濠州招義民殺之近魚孽也乾符六年汜水河魚逆流而上至垣曲平陸界魚民象逆流而上民不從君令也光啓二年揚州雨魚占如元和十四年蝗武德六年夏州蝗蝗之殘民若無功而祿者然皆貪撓之所生先儒以爲人主失禮煩苛則旱魚螺變爲蟲蝗故以屬魚孽貞觀二年六年京畿旱蝗太宗在苑中撥蝗祝之曰人以穀爲命百姓有過在予一人但當蝕我無害百姓將吞之侍臣懼帝致疾遽以爲諫帝曰所冀移災朕躬何疾之避遂吞之是歲蝗不爲災三年五月徐州蝗秋德戴廓等州蝗四年秋觀充遼等州蝗二十一年秋渠泉二州蝗永徽元年夔絳雍同等州蝗永淳元年三月京畿蝗無麥苗六月雍岐隴等州蝗長慶二年台建等州蝗開元三年七月河南河北蝗四年

夏山東蝗蝕稼聲如風雨二十五年貝州蝗有白鳥數千萬羣飛食之一夕而盡禾稼不傷廣德二年秋蝗關輔尤甚斗米千錢興元元年秋螟蝗自山而東際于海晦天蔽野草木葉皆盡貞元元年夏蝗東自海西盡河隴羣飛蔽天旬日不息所至草木葉及畜毛靡有子遺餓殣枕道民蒸蝗曝颺去翅足而食之永貞元年秋陳州蝗元和元年夏鎮冀等州蝗長慶三年秋洪州螟蝗害稼八萬頃開成元年夏鎮州河中蝗害稼二年六月魏博昭義淄青滄州兗海河南蝗三年秋河南河北鎮定等州蝗草木葉皆盡五年夏幽魏博鄆曹濮滄齊德淄青兗海河陽淮南虢陳許汝等州螟蝗害稼占曰國多邪人朝無忠臣居位食祿如蟲與民爭食故比年蟲蝗會昌元年七月關東山南鄧唐等州蝗大中八年七月劔南東川蝗咸通三年六月淮南河南蝗六年八月東都同華陝虢

等州蝗七年夏東都同華陝虢及京畿蝗九年江淮關內及東都
蝗十年夏陝虢等州蝗不絀無德虐取於民之罰乾符二年蝗自
東而西蔽天光啓元年秋蝗自東方來羣飛蔽天二年荆襄蝗米
斗錢三千人相食淮南蝗自西來行而不飛浮水緣城入揚州府
署竹樹幢節一夕如翦幡幟畫像皆齧去其首撲不能止旬日自
相食盡豕禍貞觀十七年六月司農寺豕生子一首八足自頸分
爲二貞元四年二月京師民家有豕生子兩首四足首多者上不
一也是歲宣州大雨震電有物墮地如猪手足各兩指執赤班蛇
食之頃之雲合不復見近豕禍也元和八年四月長安西市有豕
生子三耳八足自尾分爲二足多者下不一也咸通七年徐州蕭
縣民家豕出囿舞又牡豕多將鄰里羣豕而行復自相噬齧乾符
六年越州山陰民家有豕入室內壞器用銜桮缶置於水次廣明

元年絳州稷山縣民家豕生如人狀無眉目耳髮占爲邑有亂雷
電貞觀十一年四月甲子震乾元殿前槐樹震耀天之威怒以象
殺戮槐古者三公所樹也證聖元年正月丁酉雷雷者陽聲出非
其時臣竊君柄之象長安四年五月丁亥震雷大風拔木人有震
死者延和元年六月河南偃師縣李材村有震電入民家地震裂
闕丈餘長十五里深不可測所裂處并厠相通或衝冢墓柩出平
地無損李國姓也震雷威刑之象地陰類也永泰元年二月甲子
夜震霆自是無雷至六月甲申乃雷大曆十年四月甲申雷電暴
風拔木飄瓦人有震死者京畿害稼者七縣建中元年九月己卯
雷四年四月丙子東都畿汝節度使哥舒曜攻李希烈進軍至潁
橋大雨雷電人不能言者十三四馬驢多死貞元十四年五月己
酉夏至始雷元和十一年冬雷長慶二年六月乙丑大風震電落

大廟鴟尾破御史臺樹大和八年七月辛酉定陵臺大雨震廡下
 地裂二十有六步占曰士庶分離大臣專恣不救大敗會昌三年
 五月甲午始雷咸通四年十二月震雷乾符二年十二月震雷雨
 電乾寧四年李茂貞遣將符道昭攻成都至廣漢震雷有石墮于
 帳前霜貞觀元年秋霜殺稼京房易傳曰人君刑罰妄行則天應
 之以隕霜三年北邊霜殺稼永徽二年綏延等州霜殺稼調露元
 年八月邠涇寧慶原五州霜證聖元年六月睦州隕霜殺草吳越
 地燠而盛夏隕霜昔所未有四年四月延州霜殺草四月純陽用
 事象人君當布惠于天下而反隕霜是無陽也開元十二年八月
 潞綏等州霜殺稼十五年天下州十七霜殺稼元和二年七月邠
 寧等州霜殺稼九年三月丁卯隕霜殺桑十四年四月淄青隕霜
 殺惡草及荆棘而不害嘉穀寶曆元年八月邠州霜殺稼大和三

年秋京畿奉先等八縣旱霜殺稼大中三年春隕霜殺桑中和元
 年春霜秋河東早霜殺稼電貞觀四年秋丹延北永等州電顯慶
 二年五月滄州大雨電中人有死者咸亨元年四月庚午雍州大
 雨電二年四月戊子大雨電震電大風折木落則天門鴟尾三先
 儒以為電者陰脅陽也又曰人君惡聞其過抑賢用邪則電與雨
 俱信讒殺無罪則電下毀瓦破車殺牛馬永淳元年五月壬寅定
 州大雨電害麥禾及桑天授二年六月庚戌許州大雨電證聖元
 年二月癸卯滑州大雨電殺燕雀神功元年媯綏二州電聖曆元
 年六月甲午曹州大雨電久視元年六月丁亥曹州大雨電長安
 三年八月京師大雨電人畜有凍死者神龍元年四月壬子雍州
 同官縣大雨電殺鳥獸景龍元年四月己巳曹州大雨電二年正
 月己卯滄州雨電如雞卵開元八年十二月丁未滑州大雨電二

通鑑卷二百六
 卷二百六

十二年五月戊辰京畿滑南等六縣大風電傷麥大曆七年五月
 乙酉雨雹貞元二年六月丙子大雨電十七年二月丁酉雨雹已
 亥霜戊申夜震霆雨雹庚戌大雨雪而電五月戊寅好時縣風雹
 害麥十八年七月癸酉大雨電元和元年鄜坊等州雹十年秋鄜
 坊等州風雹害稼十二年夏河南雨雹中人有死者十五年三月
 京畿興平醴泉等縣雹傷麥長慶四年六月庚寅京師雨雹如彈
 丸大和四年秋鄜坊等州雹五年夏京畿奉先渭南等縣雨雹開
 成二年秋河南雹害稼四年七月鄭滑等州風雹五年六月濮州
 雨雹如拳殺人三十六牛馬甚衆會昌元年秋登州雨雹文登尤
 甚破瓦害稼四年夏雨雹如彈丸乾符六年五月丁酉宣授宰臣
 豆盧瑑崔沆制殿庭氛霧四塞及百官班賀于政事堂雨雹如梟
 卵大風雷雨拔木廣明元年四月甲申朔汝州大雨風拔街衢樹

十二三東都有雲起西北大風隨之長夏門內表道古槐樹自拔
 者十五六宮殿鴟尾皆落雨雹大如杯鳥獸殪於川澤黑青黑祥
 大曆二年十二月戊戌黑氣如塵彌漫于北方黑氣陰沴也貞元
 四年七月自陝至河陰河水黑流入汴至汴州城下一宿而復近
 黑祥也占曰法嚴刑酷傷水性也五行變節陰陽相干氣色繆亂
 皆敗亂之象十四年潤州有黑氣如隄自海門山橫亘江中與北
 固山相峙又有白氣如虹自金山出與黑氣交將旦而沒大和四
 年正月壬寅黑氣如帶東西際天咸通十四年七月僖宗即位是
 日黑氣如盤自天屬舍元殿庭火沴水武德九年二月蒲州河清
 襄楷以爲河諸侯象清陽明之效也貞觀十四年二月陝州泰州
 河清十六年正月懷州河清十七年十二月鄭州滑州河清二十
 三年四月靈州河清永徽元年正月濟州河清二年十二月衛州

河清五年六月濟州河清十六里調露二年夏豐州河清長安初醴泉坊太平公主第井水溢流又并州文水縣猷水竭武氏井溢神龍二年三月壬子洛陽城東七里地色如水樹木車馬歷歷見影漸移至都月餘乃滅長安街中往往見水影昔苻堅之將死也長安嘗有是景龍四年三月庚申京師井水溢占曰君凶又曰兵將起開元二十二年八月清夷軍黃帝祠古井湧浪二十五年五月淄州棣州河清二十九年亳州老子祠九井涸復湧乾元二年七月嵐州合河關河三十里清如井水四日而變寶應元年九月甲午太州至陝州二百餘里河清澄澈見底大曆末深州東鹿縣中有水影長七八尺遙望見人馬往來如在水中及至前則不見水建中四年五月乙巳滑州濮州河清十四年閏五月乙丑滑州河清貞元二十一年夏越州鏡湖竭是歲朗州熊武五溪水關占

曰山崩川竭國必亡又曰方伯力政厥異水關開成二年夏旱楊州運河竭大中八年正月陝州河清咸通八年七月泗州下邳雨湯殺鳥雀水沸于火則可以傷物近火沴水也兩者自上而降鳥雀民象中和三年秋汴水入于淮水關壞船數艘廣明元年夏汝州峴陽峰龍池涸近山竭也五行傳曰皇之不極是謂不建厥咎眊厥罰常陰厥極弱時則有射妖時則有龍蛇之孽時則有馬禍時則有下人伐上之癘時則有日月亂行星辰逆行謂木金火水土沴天也常陰長安四年自九月霖雨陰晦至于神龍元年正月貞元二十一年秋連月陰靈元和十五年正月庚辰至于丙申晝常陰晦微雨雪夜則晴霽占曰晝霧夜晴臣志得申咸通十四年七月靈州陰晦乾符六年秋多雲霧晦冥自旦及禺中乃解光啓元年秋河東大雲霧明年夏晝陰積六十日二年十一月淮南陰

晦雨雪至明年二月不解景福二年夏連陰四十餘日霧長壽元
年九月戊戌黃霧四塞霧者百邪之氣爲陰昌陽本于地而應于
天黃爲土土爲中宮神龍二年三月乙巳黃霧四塞景龍二年八
月甲戌黃霧昏濁不雨三年正月丁卯黃霧四塞十一月甲寅日
入後昏霧四塞經二日乃止占曰霧連日不解其國昏亂開元五
年正月戊辰昏霧四塞天寶十四載冬三月常霧起昏暗十步外
不見人是謂晝昏占曰有破國至德二載四月賊將武令珣圍南
陽白霧四塞上元元年閏四月大霧占曰兵起貞元十年三月乙
亥黃霧四塞日無光咸通九年十一月龐勛圍徐州甲辰大霧昏
塞至于丙午光化四年冬昭宗在東內武德門內煙霧四塞門外
日色皎然虹蜺武德初隋將堯君素守蒲州有白虹下城中唐隆
元年六月戊子虹蜺亘天蜺者斗之精占曰后妃陰脅王者又曰

五色迭至照于宮殿有兵延和元年六月幽州都督孫佺帥兵襲
奚將入賊境有白虹垂頭于軍門占曰其下流血至德二載正月
丙子南陽夜有白虹四上亘百餘丈元和十三年十二月丙辰有
白虹闊五尺東西亘天會昌四年正月巳酉西方有白虹咸通元
年七月巳酉朔白虹橫亘西方九年七月戊戌白虹橫亘西方光
啓二年九月白虹見西方十月壬辰夜又如之天復三年三月庚
申有曲虹在日東北龍蛇孽貞觀八年七月隴右大蛇屢見蛇女
子之祥大者有所象也又汾州青龍見吐物在空中光明如火墮
地地陷掘之得玄金廣尺長七寸顯慶二年五月庚寅有五龍見
于歧州之皇后泉先天二年六月京師朝堂墀下有大蛇出長丈
餘有大蝦蟇如盤而目赤如火相與鬪俄而蛇入于大樹蝦蟇入
于草蛇蝦蟇皆陰類朝堂出非其所也開元四年六月郴州馬嶺

山下有白蛇與黑蛇鬪白蛇長六七尺吞黑蛇至腹口眼血流黑蛇長丈餘頭穿白蛇腹出俱死天寶中洛陽有巨蛇高丈餘長百尺出芒山下胡僧無畏見之曰此欲決水瀦洛城即以天竺法咒之數日蛇死十四載七月有二龍鬪于南陽城西易坤上六龍戰于野文言曰陰疑于陽必戰至德元載八月朔成都丈人廟有肉角蛇見二載三月有蛇鬪于南陽門之外一蛇死一蛇上城建中二年夏趙州寧晉縣沙河北有棠樹甚茂民祠之爲神有蛇數百千自東西來趨北岍者聚棠樹下爲二積留南岍者爲一積俄有徑寸龜三繞行積蛇盡死而後各登其積野人以告蛇腹皆有瘡若矢所中刺史康日知圖其事奉三龜來獻四年九月戊寅有龍見于汝州城壕龍大人象其潛也淵其飛也天城壕失其所也貞元末資州得龍丈餘西川節度使韋臯匣而獻之百姓縱觀三日

永末
爲烟所薰而死大和二年六月丁丑西北有龍鬪三年成都門外有龍與牛鬪開成元年宮中有衆蛇相與鬪光化三年九月杭州有龍鬪于浙江水溢壞民廬舍占同天寶十四載光啓二年冬鄜州洛交有蛇見于縣署復見于州署蛇冬則蟄易曰龍蛇之蟄以存身也馬禍義寧二年五月戊申有馬生角長二寸未有肉角者兵象武德三年十月王世充僞左僕射韋霽馬生角當項冰隆二年監牧馬大死凡十八萬疋馬者國之武備天去其備國將危亡文明初新豐有馬生駒二首同項各有口鼻生而死又咸陽牝馬生石大如升上微有綠毛皆馬禍也開元十二年五月太原獻異馬駒兩肋各十六肉尾無毛二十五年濮州有馬生駒肉角二十九年三月滑州刺史李邕獻馬肉髮鱗臆嘶不類馬日行三百里建中四年五月滑州馬生角大和九年八月易定馬飲水因吐珠

一以獻開成元年六月揚州巨明齊家馬生角長一寸三分會昌元年四月桂州有馬生駒三足能隨羣于牧咸通三年郴州馬生角十一年沁州錦上及和川牡馬生子皆死京房易傳曰方伯分威厥妖牡馬生子乾符二年河北馬生人中和元年九月長安馬生人京房易傳曰諸侯相伐厥妖馬生人一曰人流亡二年二月蘇州嘉興馬生角光啓二年夏四月僖宗在鳳翔馬尾皆咤蓬如聿咤怒象文德元年李克用獻馬二肘膝皆有鬚長五寸許蹄大如七寸甌人痾武德四年太原尼志覺死十日而蘇貞觀十九年衛州人劉道安頭生肉角隱見不常因以惑眾伏誅角兵象肉不可以觸者永徽六年淄州高苑民吳威妻嘉州民辛道護妻皆一產四男凡物反常則為妖亦陰氣盛則母道壯也顯慶三年普州有人化為虎虎猛噬而不仁儀鳳三年四月涇州獻二小兒連心

異體初鵠縣衛士胡萬年妻吳生一男一女其胷相連餘各異體乃析之則皆死又產復然俱男也遂育之至是四歲以獻于朝永隆元年長安獲女魃長尺有二寸其狀怪異詩曰旱魃為虐如炎如焚是歲秋不雨至于明年正月永隆二年九月萬年縣女子劉凝靜衣白衣從者數人升太史令廳問比有何災異令執之以聞是夜彗星見太史司天文曆候王者所以奉若天道恭授民時者非女子所當問載初中涪州民范端化為虎神功元年二月庚子有人走入端門又入則天門至通天宮闈及仗衛不之覺時來俊臣婢產肉塊如二升器剖之有赤蟲須臾化為蜂螫人而去久視二年正月成州有大人跡見長安中郴州佐史因病化為虎欲食其嫂擒之乃人也雖未全化而虎毛生矣大極元年狂人段萬謙潛入承天門登太極殿升御牀自稱天子且言我李安國也人

相我年三十二當爲天子開元二十三年四月冀州獻長人李家
寵八尺有五寸大曆十年二月昭應婦人張產一男二女貞元八
年正月丁亥許州人李狗兒持仗上舍元殿擊欄檻伏誅十年四
月恒州有巨人跡見十五年正月戊申狂人劉忠詣銀臺稱白起
令上表天下有火災十七年十一月翰林待詔戴少平死十有六
日而蘇是歲宣州南陵縣丞李嶷死已殯三十日而蘇元和二年
商州洪崖治役夫將化爲虎衆以水沃之不果化長慶四年三月
民徐忠信潛入浴堂門寶曆二年十二月延州人賀文妻一產四
男大和二年十月狂人劉德廣入含元殿咸通七年渭州有人生
角寸許占曰天下有兵十三年四月太原晉陽民家有嬰兒兩頭
異頸四手聯足此天下不一之妖是歲民皇甫及年十四暴長七
尺餘長啜大嚼三倍如初歲餘死乾符六年秋蜀郡婦人尹生子

首如豕目在臍下占曰君失道光啓元年隰州溫泉民家有死者
既葬且半月行人聞聲呼地下其家發之則復生歲餘乃死二年
春鳳翔郿縣女子未齒化爲丈夫旬日而死京房易傳曰茲謂陰
昌賊人爲王大順元年六月資州兵王全義妻如孕覺物漸下入
股至足大拇痛甚折而生珠如彈丸漸長大如杯天祐二年五月
潁州汝陰民彭文妻一產三男疫貞觀十年關內河東大疫十五
年三月澤州疫十六年夏穀涇徐戴號五州疫十七年夏潭濠廬
三州疫十八年廬濠巴普榔五州疫二十二年卿州大疫永徽六
年三月楚州大疫永淳元年冬大疫兩京死者相枕於路占曰國
將有恤則邪亂之氣先被于民故疫景龍元年夏自京師至山東
河北疫死者千數寶應元年江東大疫死者過半貞元六年夏淮
南浙西福建道疫元和元年夏浙東大疫死者大半大和六年春

自劔南至浙西大疫開成五年夏福建台明四州疫咸通十年宣
歙兩浙疫大順二年春淮南疫死者十三四天鳴天寶十四載五
月天鳴聲若雷占曰人君有憂貞元二十一年八月天鳴在西北
中和三年三月浙西天鳴聲如轉磨無雲而雨元和十二年正月
乙酉星見而雨占曰無雲而雨是謂天泣隕石永徽四年八月己
亥隕石于同州馮翊十八光曜有聲如雷近星隕而化也庶民惟
星自上而隕民去其上之象一曰人君爲詐妄所蔽則然

五行志第二十六

魏川屯鳳
氏甫西甫甫

唐書二十六

